

欽定前漢書

卷八
之十
二

前漢書卷八

漢 蘭 臺 令 史 班 固 撰

唐正議大夫行秘書少監琅邪縣開國子顏師古注

宣帝紀第八

孝宣皇帝

荀悅曰諱詢字次卿詢之字曰謀應劭曰諡法聖善周聞曰宣

武帝曾孫戾

太子孫也

韋昭曰以違戾擅發兵故諡曰戾臣瓚曰太子誅江克以除讒賊而事不見明後武帝覺

寤遂族克家宣帝不得以加惡諡也董仲舒書曰有其功無其意謂之戾無其功有其意謂之罪師古曰瓚說

是也 太子納史良娣

服虔曰史姓也良娣官也師古曰太子有妃有良娣有孺子凡三等娣音

次第 生史皇孫

師古曰以外家姓稱之故曰史皇孫

皇孫納王夫人生宣

帝號曰皇曾孫生數月遭巫蠱事太子良娣皇孫王夫

人皆遇害語在太子傳曾孫雖在襁緥

李奇曰襁絡也以繪布爲之絡

負小兒緥小兒大藉也孟康曰緥小兒被也師古曰襁卽今之小兒緥也緥孟說是也襁音居丈反緥音保緥

音補 猶坐收繫郡邸獄

如淳曰謂諸郡邸置獄也師古曰據漢舊儀郡邸獄治天下郡

國上計者屬大鴻臚此蓋巫蠱獄

而丙吉爲廷尉監

師

日監者廷尉之官屬

治巫蠱於郡邸憐曾孫之亡辜使女徒復作

淮陽趙徵卿渭城胡組更乳養

李奇曰復作者女徒也謂輕罪男子守邊一歲

女子輒弱不任守復令作於官亦一歲故謂之復作徒也孟康曰復音服謂弛刑徒也有赦令詔書去其鉗鈇

赭衣更犯事不從徒加與民爲例故當復爲官作滿其本罪年月日律名爲復作也師古曰孟說是也趙徵卿

淮陽人胡組渭城人皆女徒也二人更還乳養曾孫而丙吉傳云郭徵卿紀傳不同未知孰是更音工衡反

私給衣食視遇甚有恩巫蠱事連歲不決至後元二年

○劉攽曰按武帝後元二年無赦元年乃有之蓋本云後元年後人誤作後元元年又就元字注二字後又誤

耳為二武帝疾往來長楊五柞宮師古曰長楊五柞二宮並在盤屋皆以樹名之

帝往來二宮之間也柞字或作柞其音同望氣者言長安獄中有天子氣上遣使者分條中都官獄師古曰中都官凡京師諸官府也繫者輕重皆

殺之內謁者令郭穰夜至郡邸獄師古曰百官表云內者署屬少府續漢書

志云掌宮中布張諸棄物丁字漢官云令秩千石蓋當時權為此使○劉攽曰謁字衍劉敞同吉拒閉

使者不得入曾孫賴吉得全因遭大赦吉迺載曾孫送

祖母史良娣家語在吉及外戚傳後有詔掖庭養視上

屬籍宗正應劭曰掖庭宮人之官有令丞宦者為之時詔勅掖庭養視之始令宗正著其屬籍

掖庭令張賀嘗事戾太子思顧舊恩師古曰顧念也哀曾孫奉

養甚謹以私錢供給教書既壯爲取暴室嗇夫許廣漢

女

應劭曰暴室宮人獄也今日薄室許廣漢坐法腐爲宦者作嗇夫也師古曰暴室者掖庭主織作染練之

署故謂之暴室取暴曬爲名耳或云薄室者薄亦暴也今俗語亦云薄曬蓋暴室職務既多因爲置獄主治其罪人故往往云暴室獄耳然本非獄名應說失之矣嗇夫者暴室屬官亦猶縣鄉之嗇夫也曬音所懈反又音所智

反

曾孫因依倚廣漢兄弟及祖母家史氏

師古曰倚音於綺反

受詩於東海馥中翁

服虔曰馥音馥師古曰東海人姓馥字中翁也馥音房福反中讀曰

仲

高材好學然亦喜游俠

師古曰喜音許吏反

鬪雞走馬具知閭

里奸邪吏治得失數上下諸陵

師古曰諸陵皆據高敞地爲之縣卽在其側帝

每周游往來諸陵縣去則上來則下故言上下諸陵

周徧三輔

師古曰游行皆至其處

常困

於蓮勺鹵中

如淳曰爲人所困辱也蓮勺縣有鹽池縱廣十餘里其鄉人名爲鹵中蓮音輦勺音

灼師古曰如說是也鹵者鹹地也今在櫟陽縣東其鄉人謂北中爲鹵鹽池也尤樂杜鄠之間

師古曰二縣之間也杜屬京兆鄠屬扶風鄠音扈率常在下杜孟康曰在長安南師古曰率者

總計之言也下杜卽今之杜城時會朝請舍長安尚冠里文穎曰以屬第尚親故歲

時隨宗室朝會也如淳曰春日朝秋日請師古曰舍止也尚冠者長安中里名帝會朝請之時卽於此里中止

息請音才姓反身足下有毛臥居數有光耀師古曰遍身及足下皆有毛每

買餅所從買家輒大饑師古曰饑讀曰售亦以是自怪元平元

年四月昭帝崩毋嗣大將軍霍光請皇后徵昌邑王六

月丙寅王受皇帝璽綬尊皇后曰皇太后癸巳光奏王

賀淫亂請廢語在賀及光傳秋七月光奏議曰禮人道

親親故尊祖尊祖故敬宗大宗無嗣擇支子孫賢者爲

嗣孝武皇帝曾孫病已

師古曰蓋以夙遭屯難而多病苦故名病已欲其速差也後以

爲鄙更改諱詢

有詔掖庭養視至今年十八師受詩論語孝經

操行節儉慈仁愛人可以嗣孝昭皇帝後奉承祖宗子

萬姓

師古曰天子以萬姓爲子故云子萬姓

奏可遣宗正德至曾孫尚冠

里舍洗沐賜御府衣太僕以輪獵車奉迎曾孫

文穎曰輪獵小

車前有曲輿不衣也近世謂之輪獵車也孟康曰今之載獵車也前有曲輪特高大獵時立其中格射禽獸李奇曰蘭輿輕車也師古曰文李二說皆是時未備天子車駕故且取其輕便耳非藉高大也孟說失之輪音鈴

就齊宗正府庚申入未央宮見皇太后封爲陽武侯

師古

日先封侯者不欲立庶人爲天子也

已而羣臣奉上璽綬卽皇帝位謁高

廟八月己巳丞相敞薨

師古曰楊敞也

九月大赦天下十一月

壬子立皇后許氏賜諸侯王以下金錢至吏民鰥寡孤獨各有差皇太后歸長樂宮初置屯衛

本始元年春正月募郡國吏民訾百萬以上徙平陵

文類

曰昭帝陵

遣使者持節詔郡國二千石謹牧養民而風德化

師古曰以德化被於下故云風也詩序曰上以風化下

大將軍光稽首歸政上謙

讓委任焉論定策功益封大將軍光萬七千戶車騎將

軍光祿勳富平侯安世萬戶

李斐曰居光祿位以車騎官號尊之無車騎官屬

詔曰故丞相安平侯敞等居位守職與大將軍光車騎

將軍安世建議定策以安宗廟功賞未加而薨其益封

敞嗣子忠及丞相陽平侯義

師古曰蔡義

度遼將軍平陵侯

明友

師古曰范明友

前將軍龍雒侯增

師古曰韓增

太僕建平侯延

年

師古曰杜延年

太常蒲侯昌

師古曰蘇昌

諫大夫宜春侯譚

師古曰王

譚

當塗侯平

師古曰功臣表云魏不害以捕反者胡倩功封當塗侯其子聖以定策功益封凡二

千二百戶今此紀言當塗侯平與其祖父復陸支本匈奴胡也歸義

杜侯屠耆堂

蘇林曰姓復陸

爲屬國王從驃騎有功乃更封也

長信少府關內侯勝

師古曰夏侯勝

邑戶各有差封御史大夫廣明爲昌水侯

師古曰田

廣明後將軍克國爲營平侯

師古曰趙克國

大司農延年爲陽城

侯

師古曰田延年

少府樂成爲爰氏侯

師古曰史樂成

光祿大夫遷爲

平丘侯

師古曰王遷

賜右扶風德

師古曰周德

典屬國武

師古曰蘇武

廷尉光

師古曰李光

宗正德

師古曰楚元王之曾孫劉辟強子

大鴻臚賢

師古

曰韋 詹事畸 蘇林曰畸音畸隻之畸師古曰宋畸也音居宜反 光祿大夫吉 師古

曰丙 京輔都尉廣漢 師古曰趙廣漢也三輔郡皆有都尉如諸郡左輔都尉治高陵右輔

都尉治郿京輔都尉皆關內侯德武食邑 張晏曰舊關內侯無邑也

以蘇武守節外國劉德宗室俊彥故特令食邑 夏四月庚午地震詔內郡國舉

文學高第各一人 韋昭曰中國爲內郡緣邊有夷狄障塞者爲外郡成帝時內郡舉方正北

邊二十二郡舉勇猛士 五月鳳皇集膠東千乘赦天下賜吏二千

石諸侯相下至中都官官吏六百石爵各有差 如淳曰中都官

宦吏奄人爲吏者也晉灼曰凡職在京師者也師古曰二說皆非也中都官謂在京師諸官也宦吏諸奄官也

自左更至五大夫 師古曰左更第十二爵也五大夫第九爵也更音工衡反。劉敞曰案此

賜爵不及中二千石者緣王卽位九侯率已爲關內侯矣 賜天下人爵各一級孝者

二級女子百戶牛酒租稅勿收六月詔曰故皇太子在

湖未有號諡

師古曰湖縣名也死於湖因卽葬焉

歲時祠其議諡置園邑

語在太子傳秋七月詔立燕刺王太子建爲廣陽王

師古

曰刺音來曷反

立廣陵王胥少子弘爲高密王

二年春以水衡錢爲平陵徙民起第宅

應劭曰水衡與少府皆天子私

藏耳縣官公作當仰給司農今出水衡錢言宣帝卽位爲異政也晉灼曰食貨志初大司農管鹽鐵官布多故置水衡欲以主鹽鐵及楊可告緡上林財物衆乃令水衡主上林上林三官主鑄錢也大司農陽

城侯田延年有罪自殺

師古曰坐增餽直而自入

夏五月詔曰朕以

眇身奉承祖宗夙夜惟念孝武皇帝躬履仁義選明將

討不服匈奴遠遁平氏羌昆明南越百蠻鄉風

師古曰鄉讀曰

嚮也款塞來享應劭曰款叩也皆叩塞門來服從也如淳曰款寬也請除守塞者自保不爲寇害也

故曰款五原塞師古曰應說是也此況說夷狄來賓之事非呼韓邪保塞意也建太學修郊祀

定正朔協音律封泰山塞宣房蘇林曰隄名在東郡界李斐曰決河上宮名也

張晏曰瓠子隄名師古曰蘇張二說皆是符瑞應寶鼎出白麟獲功德茂盛

不能盡宣而廟樂未稱師古曰稱副也其議奏有司奏請宜加

尊號六月庚午尊孝武廟爲世宗廟奏盛德文始五行

之舞應劭曰宣帝復采昭德之舞爲盛德舞以尊世宗廟也諸帝廟皆常奏文始四時五行舞也天

子世世獻武帝巡狩所幸之郡國皆立廟賜民爵一級

女子百戶牛酒匈奴數侵邊又西伐烏孫烏孫昆彌及

公主因國使者上書師古曰昆彌烏孫王之號也國使者漢朝之使也言昆彌

願發國精兵擊匈奴唯天子哀憐出兵以救公主秋大

發興調關東輕車銳卒

師古曰調亦選也銳利也言其勇利也調音徒鈞反

選郡

國吏三百石伉健習騎射者皆從軍

師古曰伉強也音口浪反

御史

大夫田廣明爲祁連將軍

應劭曰祁連匈奴中山名也諸將分部廣明備此山因以

爲號也師古曰祁音上夷反

後將軍趙克國爲蒲類將軍

應劭曰蒲類匈奴中

海名也在敦煌北晉灼曰匈奴傳有蒲類澤師古曰晉說是也

雲中太守田順爲虎牙

將軍及度遼將軍范明友前將軍韓增凡五將軍兵十

五萬騎校尉常惠持節護烏孫兵咸擊匈奴

三年春正月癸亥皇后許氏崩戊辰五將軍師發長安

夏五月軍罷祁連將軍廣明虎牙將軍順有罪下有司

皆自殺

晉灼曰田千秋子也廣明坐逗留順坐增虜獲

校尉常惠將烏孫兵入

匈奴右地大克獲封列侯大旱郡國傷旱甚者民毋出

租賦三輔民就賤者且毋收事盡四年

晉灼曰不給官役也師古曰收

謂租賦也事謂役使也盡本始四年而止

六月己丑丞相義薨

師古曰蔡義

四年春正月詔曰蓋聞農者興德之本也今歲不登已

遣使者振貸困乏其令太官損膳省宰

師古曰膳具食也食之善者也

宰爲屠殺也省減也漢儀注太宰令屠者七十二人宰二百人

樂府減樂人使歸就農

業丞相以下至都官令丞

師古曰都官令丞京師諸署之令丞

上書入穀

輸長安倉助貸貧民民以車船載穀入關者得毋用傳

師古曰傳傳符也欲穀之多故不問其出入也傳音張戀反

三月乙卯立皇后霍氏

賜丞相以下至郎吏從官金錢帛各有差赦天下夏四月壬寅郡國四十九地震或山崩水出詔曰蓋災異者天地之戒也朕承洪業奉宗廟託于士民之上未能和羣生廼者地震北海琅邪壞祖宗廟朕甚懼焉丞相御史其與列侯中二千石博問經學之士有以應變

師古曰謂

禦塞災異也

輔朕之不逮毋有所諱令三輔太常內郡國舉

賢良方正各一人律令有可蠲除以安百姓條奏被地震壞敗甚者勿收租賦大赦天下上以宗廟墮素服避正殿五日

師古曰墮者毀也音火規反

五月鳳皇集北海安丘淳于

師古曰二縣皆屬北海郡

秋廣川王吉有罪廢遷上庸自殺

○宋祁曰吉一

作去
字

地節元年

應劭曰以先者地震山崩水出於是改年曰地節欲令地得其節

春正月有

星孛于西方三月假郡國貧民田

師古曰權以給之不常與

夏六月

詔曰蓋聞堯親九族以和萬國

師古曰尚書堯典云克明俊德以親九族九族

既睦平章百姓百姓昭明協和萬邦故詔引之

朕蒙遺德奉承聖業惟念宗室

屬未盡而以罪絕若有賢材改行勸善其復屬使得自

新

師古曰復音扶日反

冬十一月楚王延壽謀反自殺十二月癸

亥晦日有蝕之

二年春三月庚午大司馬大將軍光薨詔曰大司馬大

將軍博陸侯

師古曰尊之故不名

宿衛孝武皇帝三十餘年輔孝

昭皇帝十有餘年遭大難躬秉義率三公諸侯九卿大

夫定萬世策以安宗廟天下蒸庶咸以康寧

師古曰蒸衆庶人也

康安也

功德茂盛朕甚嘉之復其後世疇其爵邑

張晏曰律非始

封十減二疇者等也言不復減也師古曰復音方目反

世世毋有所與

師古曰與讀曰豫

功如蕭相國夏四月鳳皇集魯郡羣鳥從之

師古曰今流俗書本

此下云戊申立皇太子而後年又有立皇太子事此蓋以元紀云元帝二歲宣帝卽位八歲爲皇太子故後人

妄於此書加之舊本無也據疏廣及丙吉傳並云地節三年立皇太子此卽明驗而或者妄爲臆說乖於實矣

大赦天下五月光祿大夫平丘侯王遷有罪下獄死上

始親政事又思報大將軍功德廼復使樂平侯山領尙

書事

師古曰霍山光之兄孫

而令羣臣得奏封事以知下情五日

一聽事自丞相以下各奉職奏事以傳奏其言

應劭曰敷陳也

各自奏陳其言然後試之以官考其功德也師古曰傳讀曰敷

考試功能侍中尚書功

勞當遷及有異善厚加賞賜至于子孫終不改易

師古曰言

各久其職事也○劉攽曰至于子孫謂賞賜逮及子孫非謂侍中尚書官至于子孫不改易也

樞機周

密品式備具上下相安莫有苟且之意也

三年春三月詔曰蓋聞有功不賞有罪不誅雖唐虞猶

不能以化天下今膠東相成勞來不怠

師古曰王成也勞來者言慰勉

而招延之也小雅鴻鴈之詩序曰勞來還定安集之勞音盧到反來音盧代反

流民自占八萬

餘口

師古曰占者謂自隱度其戶口而著名籍也占音之贍反

治有異等

師古曰政治異於常

等其秩成中二千石賜爵關內侯又曰鰥寡孤獨高年

貧困之民朕所憐也前下詔假公田貸種食

師古曰貸音吐戴反

其加賜鰥寡孤獨高年帛二千石嚴教吏謹視遇毋令

失職

師古曰職常也失職謂失其常業也

令內郡國舉賢良方正可親民

者夏四月戊申立皇太子大赦天下賜御史大夫爵關

內侯中二千石爵右庶長

張晏曰自公孫弘後丞相常封列侯第二十等爵故賜御

史大夫爵關內侯第十九等爵也右庶長第十一等爵也師古曰張說非也此以立皇太子國之大慶故特賜御史大夫及中二千石爵耳非常制也天下當爲父後者爵一級賜廣陵

王黃金千斤諸侯王十五人黃金各百斤列侯在國者

八十七人黃金各二十斤冬十月詔曰廼者九月壬申

地震朕甚懼焉有能箴朕過失

師古曰箴戒也

及賢良方正直

言極諫之士以匡朕之不逮

師古曰匡正也

毋諱有司

李奇曰諱避也

雖有司在顯職皆言其過勿避之

朕既不德不能附遠是以邊境屯戍

未息今復飭兵重屯久勞百姓

師古曰飭讀與勅同飭整也

非所以

綏天下也其罷車騎將軍右將軍屯兵又詔池籞未御

幸者假與貧民

蘇林曰折竹以繩縣連禁禦使人不得往來律名爲籞服虔曰籞在池水中作

室可用棲鳥鳥入中則捕之應劭曰池者陂池也籞者禁苑也臣瓚曰籞者所以養鳥也設爲籞落周覆其上

令鳥不得出猶苑之蓄獸池之畜魚也師古曰蘇應二說是

郡國宮館勿復修治流

民還歸者假公田貸種食

師古曰貸音吐戴反種五穀種也音之勇反

且勿

算事

師古曰不出算賦及給徭役

十一月詔曰朕既不逮導民不明

師古曰不逮者意慮不及也

反側晨興念慮萬方不忘元元惟恐羞

先帝聖德

師古曰羞謂忝辱也

故竝舉賢良方正以親萬姓歷載

臻茲然而俗化闕焉

師古曰多歷年載迄至干今

傳曰孝弟也者其

爲仁之本與

師古曰論語載有若之言與讀曰予

其令郡國舉孝弟有行

義聞於鄉里者各一人十二月初置廷尉平四人秩六

百石省文山郡并蜀

師古曰以其縣道隸蜀郡

四年春二月封外祖母爲博平君故鄴侯蕭何曾孫建

世爲侯詔曰導民以孝則天下順今百姓或遭衰經凶

災

師古曰衰音干回反

而吏繇事使不得葬

師古曰繇讀曰徭事謂役使之

傷孝

子之心朕甚憐之自今諸有大父母父母喪者勿繇事

使得收斂送終盡其子道夏五月詔曰父子之親夫婦

之道天性也雖有患禍猶蒙死而存之

師古曰蒙冒也

誠愛結

於心仁厚之至也豈能違之哉自今子首匿父母妻匿

夫孫匿大父母皆勿坐

師古曰凡首匿者言為謀首而藏匿罪人

其父母匿

子夫匿妻大父母匿孫罪殊死皆上請廷尉以聞立廣

川惠王孫文為廣川王秋七月大司馬霍禹謀反詔曰

廼者東織室令史張赦

應劭曰舊時有東西織室織作文繡郊廟之服令史其主者史

使魏郡豪李竟

文穎曰有權勢豪右大家

報冠陽侯霍雲謀為大逆

如淳曰報白也師古曰此說非也謂張赦因李竟傳言於霍雲與共謀反耳非告白其罪也赦既為織室令史身在京師不須李竟發之據霍禹傳其事明矣朕以大將軍故抑而不揚冀其

自新今大司馬博陸侯禹與母宣成侯夫人顯及從昆

前漢書卷八
帝紀
十一
弟冠陽侯雲樂平侯山

師古曰據霍光傳雲山皆去病之孫則於禹爲子行也今此紀

言從昆弟蓋傳寫者脫于字耳當言從昆弟子也

諸姊妹壻度遼將軍范明友

長信少府鄧廣漢中郎將任勝騎都尉趙平長安男子

馮殷等

晉灼曰漢語字子都

謀爲大逆顯前又使女侍醫淳于衍

進藥殺共哀后

師古曰殺讀曰弑共讀曰恭

謀毒太子欲危宗廟逾

亂不道咸伏其辜諸爲霍氏所誣誤未發覺在吏者皆

赦除之八月己酉皇后霍氏廢九月詔曰朕惟百姓失

職不贍遣使者循行郡國問民所疾苦

師古曰行音下更反

吏或

營私煩擾不顧厥咎朕甚閔之今年郡國頗被水災已

振貸

師古曰貸音吐戴反

鹽民之食而賈咸貴

師古曰賈讀曰價其下亦同

衆

庶重困

師古曰更增其困也重音直用反

其滅天下鹽賈又曰令甲死

者不可生

文穎曰蕭何承秦法所作爲律令律經是也天子詔所增損不在律上者爲令令甲者前

帝第一令也如淳曰令有先後故有令甲令乙令丙師古曰如說是也甲乙者若今之第一第二篇耳刑

者不可息

李斐曰息滅也若黜削者雖欲改過其創痍不可復滅也師古曰息謂生長也言劓刑墮

割之徒不可更生長亦猶謂子爲息耳李說非也

此先帝之所重而吏未稱

師古

日稱今繫者或以掠辜若飢寒瘕死獄中

蘇林曰瘕病也囚徒病律

名爲瘕如淳曰律囚以飢寒而死曰瘕師古曰瘕病是也此言囚或以掠笞及飢寒及疾病而死如說非矣瘕

音瘦字或作瘕其音亦同何用心逆人道也朕甚痛之其令郡國歲

上繫囚以掠笞若瘦死者所坐名縣爵里

師古曰名其人名也縣所

屬縣也爵其身之官爵也里所居邑里也

丞相御史課殿最以聞

師古曰凡言殿最者

殿後也課居後也最凡要之首也課居先也殿音丁見反十二月清河王年有罪廢

遷房陵

元康元年春以杜東原上爲初陵更名杜縣爲杜陵徙

丞相將軍列侯吏二千石訾百萬者杜陵三月詔曰廼

者鳳皇集泰山陳留甘露降未央宮朕未能章先帝休

烈師古曰章明也休美也烈業也協寧百姓承天順地調序四時獲蒙

嘉瑞賜茲祉福夙夜兢兢靡有驕色內省匪解永惟罔

極師古曰省視也永長也惟思也罔無也極中也帝言內自視察不敢惰怠長思政道恐無其中也解讀曰

懈書不云乎鳳皇來儀庶尹允諧師古曰虞書益稷之篇曰簫韶九成鳳皇

來儀擊石拊石百獸率舞庶尹允諧言奏樂之和鳳皇以其容儀來下百獸相率舞蹈是乃衆官之長信皆和

輯故神人交暢其赦天下徒賜勤事吏中二千石以下至六百

石爵自中郎吏至五大夫

師古曰賜中郎吏爵得至五大夫自此以上每爲等級而

高賜也五大夫第九爵也一日二千石至五大夫自此以下而差降○劉敞曰爵自中郎吏文誤蓋本云自中更至五大夫傳者誤以更爲吏遂衍出郎字與民爵不過公乘則賜吏爵自五大夫而上也以中二千石爵中更二千石亦當左更真比同千石當右庶長六百石則五大夫矣尋本始元年詔文則知此說是佐史

以上二級民一級女子百戶牛酒加賜鰥寡孤獨三老

孝弟力田帛所振貸勿收夏五月立皇考廟益奉明園

戶爲奉明縣

師古曰奉明園卽皇考史皇孫之所葬也本名廣明後追改也

復高皇帝

功臣絳侯周勃等百三十六人家子孫令奉祭祀

師古曰復

音方目反世世勿絕其母嗣者復其次秋八月詔曰朕

不明六藝鬱于大道

孟康曰鬱不通也

是以陰陽風雨未時其

博舉吏民厥身修正通文學明於先王之術宣究其意

者各二人

師古曰究盡也

中二千石各一人

劉敞曰此詔是下丞相御史者故

云各二人下云中二千石各一人於文似少潤飾

冬置建章衛尉

二年春正月詔曰書云文王作罰刑茲無赦

師古曰周書康誥之

辭也言文王作法罰其有亂常違教者則刑之無放釋也

今吏修身奉法未有能稱

朕意朕甚愍焉其赦天下與士大夫厲精更始

李斐曰今吏已

修身奉法矣但不能稱上意故赦之師古曰言文王作罰有犯之者皆刑無赦今我意有所闕閔吏修身奉法

矣而未稱其任故特赦之與更始耳李說非也○劉敞曰言吏修身奉法未有能稱朕意故須赦也何則身不

修則不能率下法不奉則或阿枉如此則民生罪者乃無辜安得如文王刑茲無赦也○劉敞曰此詔正謂吏

未能修身奉法有稱上意者故特赦之與更始申儆之也顏李以意疑宣帝不當謂吏皆未修身奉法乃斷其辭曲爲釋解師古曰王二月乙丑立皇后王氏奉光女賜丞相

失之遠矣師古曰王以下至郎從官錢帛各有差三月以鳳皇甘露降集賜

天下吏爵二級民一級女子百戶牛酒鰥寡孤獨高年

帛夏五月詔曰獄者萬民之命所以禁暴止邪養育羣

生也能使生者不怨死者不恨則可謂文吏矣今則不

然用法或持巧心析律貳端深淺不平師古曰析分也謂分破律條妄

生端緒以出入人罪謂也增辭飾非以成其罪奏不如實上亦亡繇知

師古曰上者天子自謂也繇讀與由同此朕之不明吏之不稱四方黎民

將何仰哉二千石各察官屬勿用此人吏務平法或擅

興繇役飾厨傳稱過使客

韋昭曰厨謂飲食傳謂傳舍言修飾意氣以稱過使而已

師古曰使人及賓客來者稱其意而遣之令過去也稱音尺孕反過者過度之過也

越職踰法以

取名譽譬猶踐薄冰以待白日豈不殆哉

師古曰殆危也

今天

下頗被疾疫之災朕甚愍之其令郡國被災甚者毋出

今年租賦又曰聞古天子之名難知而易諱也今百姓

多上書觸諱以犯罪者朕甚憐之其更諱詢諸觸諱在

令前者赦之

師古曰令謂今詔書

冬京兆尹趙廣漢有罪要斬

三年春以神爵數集泰山賜諸侯王丞相將軍列侯二

千石金郎從官帛各有差賜天下吏爵二級民一級女

子百戶牛酒鰥寡孤獨高年帛三月詔曰蓋聞象有罪

舜封之

應劭曰象者舜弟也日以殺舜爲事舜爲天子猶封之於有鼻之國

骨肉之親祭

而不殊

師古曰祭明也殊絕也常明於仁恩不離絕也

其封故昌邑王賀爲海

昏侯又曰朕微眇時御史大夫丙吉中郎將史曾史立

長樂衛尉許舜侍中光祿大夫許延壽皆與朕有舊恩

及故掖庭令張賀輔導朕躬修文學經術恩惠卓異厥

功茂焉詩不云乎無德不報

師古曰大雅抑之詩也言受人之德必有報也

封

賀所子弟子侍中中郎將彭祖爲陽都侯

如淳曰賀張安世兄有一

子早死故以彭祖爲子師古曰所子者言養弟子以爲子

追賜賀諡曰陽都哀侯吉

曾立舜延壽皆爲列侯故人下至郡邸獄復作

師古曰謂胡組

趙徵卿之輩也復扶目反

嘗有阿保之功

臣贊曰阿倚保養也

皆受官祿田宅

財物各以恩深淺報之夏六月詔曰前年夏神爵集雍

晉灼曰漢注大如鷄爵黃喉白頸

黑背腹斑文也師古曰鷄音晏

今春五色鳥以萬數

飛過屬縣

師古曰三輔諸縣也

翱翔而舞欲集未下其令三輔毋

得以春夏擿巢探卵彈射飛鳥

師古曰擿音佗秋反射音食亦反○宋祁曰南

本飛鳥下有

畢年二字

具爲令立皇子欽爲淮陽王

四年春正月詔曰朕惟耆老之人髮齒墮落血氣衰微

亦亡暴虐之心今或罹文法拘執囹圄不終天命朕甚

憐之自今以來諸年八十以上非誣告殺傷人佗皆勿

坐

師古曰誣告人及殺傷人皆如舊法其餘則不論

遣太中大夫彊等十二人

循行天下

師古曰行音下更反

存問鰥寡覽觀風俗察吏治得失

舉茂材異倫之士二月河東霍徵史等謀反誅三月詔曰廼者神爵五采以萬數集長樂未央北宮高寢甘泉泰畤殿中及上林苑朕之不逮寡于德厚屢獲嘉祥非朕之任其賜天下吏爵二級民一級女子百戶牛酒加

賜三老孝弟力田帛人二匹鰥寡孤獨各一匹秋八月

賜故右扶風尹翁歸子黃金百斤以奉其祭祀又賜功

臣適後黃金人二十斤

師古曰適讀曰嫡承嗣者也或子或孫不拘後裔故總言後也

丙寅大司馬衛將軍安世薨比年豐穀石五錢

師古曰比類也

神爵元年

應劭曰前年神爵集于長樂宮故改元

春正月行幸甘泉郊泰

時三月行幸河東祠后土詔曰朕承宗廟戰戰栗栗惟

萬事統未燭厥理

師古曰惟思也統緒也燭照也

迺元康四年嘉穀立

稷降于郡國

服虔曰立稷黑粟也

神爵仍集

師古曰仍類也

金芝九莖產

于函德殿銅池中

服虔曰金芝色像金也如淳曰函亦舍也銅池承雷也晉灼曰以銅作池

也師古曰函德殿名也銅池承雷是也以銅爲之函讀與舍同

九真獻奇獸

蘇林曰白象也晉灼

曰漢注駟形麟色牛角仁而愛人師古曰非白象也晉說是矣

南郡獲白虎威鳳爲寶

服虔曰威鳳鳥名也晉灼曰鳳之有威儀者也與尚書鳳皇來儀同意師古曰晉說是

朕之不明

震于珍物

服虔曰震驚也蘇林曰震動也珍物瑞應也師古曰蘇說是也獲珍物而心感動也

躬齋精祈爲百姓

師古曰飭與勅同爲音于僞反

東濟大河天氣清靜

神魚舞河幸萬歲宮神爵翔集

服虔曰萬歲宮在東郡平陽縣今有津晉灼曰

黃圖汾陰有萬歲宮是時幸河東師古曰晉說是

朕之不德懼不能任其以五

年爲神爵元年賜天下勤事吏爵二級民一級女子百

戶牛酒鰥寡孤獨高年帛所振貸物勿收行所過毋出

田租西羌反發三輔中都官徒弛刑

李奇曰弛廢也謂若今徒解鉗欬

衣置任輸作也師古曰中都官京師諸官府也漢儀注長安中諸官獄三十六所弛刑李說是也若今徒囚但

不枷鎖而責保散役之耳弛音式爾反

及應募伏飛射士

服虔曰周時度江越人在船下

負船將覆之伏飛入水殺之漢因以材力名官如淳曰呂氏春秋荆有茲非得寶劍於干將渡江中流兩蛟繞

舟茲非拔寶劍赴江刺兩蛟殺之荆王聞之任以執圭後世以爲勇力之官茲伏音相近臣瓚曰本秦左弋官

也武帝改曰伏飛官有一令九丞在上林苑中結婚織以弋鳧鴈歲萬頭以供祀宗廟許慎曰伏便利也便利

增織以弋鳧鴈故曰伏飛詩曰挾拾旣伏者也師古曰取古勇力人以名官熊渠之類是也亦因取其便利輕

疾若飛故號伏飛弋鳧鴈事自使伏飛爲之非取飛鳥爲名瓚說失之伏音次
羽林孤兒應劭曰天

有羽林大將軍之星林喻若林木之盛羽羽翼鷲擊之意故以名武官焉如淳曰百官表取從軍死事者之子養羽林官教以五兵號曰羽林孤兒少壯令從軍漢儀注羽林從官七百人

胡越騎三河潁

川沛郡淮陽汝南材官金城隴西天水安定北地上郡

騎士羌騎詣金城夏四月遣後將軍趙克國彊弩將軍

許延壽擊西羌六月有星孛于東方卽拜酒泉太守辛

武賢爲破羌將軍

師古曰卽就也就酒泉而拜之不徵入

與兩將軍並進

師古曰兩將軍卽趙克國許延壽

詔曰軍旅暴露轉輸煩勞其令諸侯

王列侯蠻夷王侯君長當朝二年者皆毋朝

師古曰朝來年之正

月秋賜故大司農朱邑子黃金百斤以奉祭祀後將軍

克國言屯田之計語在克國傳

二年春二月詔曰廼者正月乙丑鳳皇甘露降集京師

羣鳥從以萬數朕之不德屢獲天福祇事不怠其赦天

下夏五月羌虜降服斬其首惡大豪楊玉酋非首

文穎曰羌

胡名大帥爲酋如中國言魁非首其名也如淳曰酋音酒醕熟師古曰文說失矣酋者自其魁帥之稱而此酋

不當其義也蓋首惡者唱首爲惡也大豪者魁帥也楊玉及酋非皆人名言斬此二人之首級耳旣已言大豪

不當重言酋且趙克國傳又云酋非楊玉首此其明驗也酋音才由反○宋祁曰予按醕非字當爲酋音酒熟

鄭注月令酒孰曰酋置金城屬國以處降羌秋匈奴日逐王先賢

揮鄭氏曰揮音纒束之纒晉灼曰音田師古曰鄭音是也將人衆萬餘來降使都

護西域騎都尉鄭吉迎日逐破車師皆封列侯九月司

隸校尉蓋寬饒有罪下有司自殺匈奴單于遣名王奉

獻

師古曰名王者謂有大名以別諸小王也

賀正月始和親

師古曰賀來歲之正月

三年春起樂游苑

師古曰三輔黃圖云在杜陵西北又關中記云宣帝立廟於曲池之北號

樂游案其處則今之所呼樂游廟者是也其餘基尚可識焉蓋本爲苑後因立廟乎樂音來各反

三月

丙午丞相相薨

師古曰魏相

秋八月詔曰吏不廉平則治道

衰今小吏皆勤事而奉祿薄

師古曰奉音扶用反其下亦同

欲其毋侵

漁百姓難矣

如淳曰漁奪也謂奪其利便也晉灼曰許慎云捕魚之字也師古曰漁者若言漁獵

也晉說是也

其益吏百石以下奉十五

如淳曰律百石奉月六百韋昭曰若食一

斛則益五斗○宋祁曰刊誤據後漢志及師古百官表注當云律百石奉月十六斛

四年春二月詔曰廼者鳳皇甘露降集京師嘉瑞並見

修興泰一五帝后土之祠祈爲百姓蒙祉福

師古曰爲音于僞反

鸞鳳萬舉蜚覽翱翔集止于旁

師古曰萬舉猶言舉以萬數也蜚古飛字也言

鸞鳳飛翔覽觀都邑也

齊戒之暮神光顯著薦鬯之夕神光交錯

師古曰鬯香酒所以祭神

或降于天或登于地或從四方來集于壇

上帝嘉嚮海內承福

師古曰嚮讀曰饗

其赦天下賜民爵一級

女子百戶牛酒鰥寡孤獨高年帛夏四月潁川太守黃

霸以治行尤異秩中二千石

如淳曰太守雖號二千石有千石八百石居者有功

德茂異乃得滿秩霸得中二千石九卿秩也晉灼曰此直謂二千石增秩爲中二千石耳不謂滿不滿也師古

曰如說非也霸舊已二千石矣今增爲中二千石以寵異之此與地節三年增膠東相王成秩其事同耳漢制

秩二千石者一歲得一千四百四十石實不滿二千石也其云中二千石者一歲得二千一百六十石舉成數

言之故曰中二千石中者滿也賜爵關內侯黃金百斤及潁川吏民有

行義者爵人二級力田一級貞婦順女帛令內郡國舉

賢良可親民者各一人五月匈奴單于遣弟呼留若王

勝之來朝

師古曰呼留若者王
之號也勝之其人名

冬十月鳳皇十一集杜

陵十一月河南太守嚴延年有罪弃市十二月鳳皇集

上林

五鳳元年

應劭曰先者鳳皇
五至因以改元云

春正月行幸甘泉郊泰畤

皇太子冠皇太后賜丞相將軍列侯中二千石帛人百

匹太夫人八十匹

○宋祁曰一本
作夫丁八十匹

夫人六十匹

○宋祁
曰一本

無此
五字

又賜列侯嗣子爵五大夫男子爲父後者爵一級

夏赦徒作杜陵者冬十二月乙酉朔日有蝕之左馮翊

韓延壽有罪弃市

二年春三月行幸雍祠五時夏四月己丑大司馬車騎

將軍增薨

師古曰韓增

秋八月詔曰夫婚姻之禮人倫之大

者也酒食之會所以行禮樂也

○劉攽曰多樂字○陽夏公曰古語多此類非

衍字

今郡國二千石或擅爲苛禁禁民嫁娶不得具酒

食相賀召由是廢鄉黨之禮令民亡所樂非所以導民

也詩不云乎民之失德乾餱以愆

師古曰小雅伐木之詩也餱食也愆過也

言人無恩德不相飲食則闕乾餱之事爲過惡也乾音干餱音侯

勿行苛政冬十一月

匈奴呼遼累單于帥衆來降

師古曰遼古速字累音力追反

封爲列侯

十二月平通侯楊惲

師古曰惲音於吻反

坐前爲光祿勳有罪免

爲庶人不悔過怨望大逆不道要斬

三年春正月癸卯丞相吉薨

師古曰丙吉也

三月行幸河東祠

后土詔曰往者匈奴數爲邊寇百姓被其害朕承至尊

未能綏安匈奴虛閭權渠單于請求和親病死右賢王

屠耆堂代立骨肉大臣立虛閭權渠單于子爲呼韓邪

單于擊殺屠耆堂諸王並自立分爲五單于更相攻擊

師古曰更音工衡反

死者以萬數畜產大耗什八九

師古曰耗損也言十損其

八九也耗音呼到反

人民飢餓相燔燒以求食

師古曰燔焚也音扶元反

因大

乖亂單于闕氏

服虔曰闕氏音焉支

子孫昆弟及呼遼累單于名

王右伊秩訾且渠當戶以下

師古曰伊秩訾且渠當戶皆匈奴官號也訾音子移

反且音子余反

將衆五萬餘人來降歸義單于稱臣使弟奉珍

朝賀五月北邊晏然靡有兵革之事朕飭躬齊戒

師古曰飭

與勅同

郊上帝祠后土神光竝見或與于谷燭耀齊宮十

有餘刻

師古曰燭亦照也刻者以漏言時也

甘露降神爵集已詔有司告

祠上帝宗廟三月辛丑鸞鳳又集長樂宮東闕中樹上

張晏曰門外闕內衡馬之裏樹也

飛下止地文章五色留十餘刻吏民

並觀朕之不敏懼不能任婁蒙嘉瑞獲茲祉福

師古曰婁古屢

字書不云乎雖休勿休祇事不怠

師古曰周書呂刑之辭言雖見褒美勿自

以爲有德美當敬於事無怠情也

公卿大夫其勗焉

師古曰勗勉也

減天下口

錢赦殊死以下賜民爵一級女子百戶牛酒大酺五日

加賜鰥寡孤獨高年帛置西河北地屬國以處匈奴降者

四年春正月廣陵王胥有罪自殺匈奴單于稱臣遣弟

谷蠡王入侍

服虔曰谷音鹿韋昭曰蠡音如麗反師古曰谷服音是也蠡音洛奚反

以邊

塞亡寇減戍卒什二大司農中丞耿壽昌奏設常平倉

以給北邊

應劭曰壽昌奏令邊郡穀賤時增價而糴穀貴時減價而糴名曰常平倉見食貨志

省

轉漕賜爵關內侯夏四月辛丑晦日有蝕之詔曰皇天

見異以戒朕躬是朕之不逮吏之不稱也

師古曰稱副也

以前

使使者問民所疾苦復遣丞相御史掾二十四人循行

天下

師古曰行音下更反

舉冤獄察擅爲苛禁深刻不改者

甘露元年春正月行幸甘泉郊泰畤匈奴呼韓邪單于

遣子右賢王銖婁渠堂入侍

師古曰銖音殊婁音力于反

二月丁巳

大司馬車騎將軍延壽薨

文穎曰許延壽

夏四月黃龍見新豐

丙申太上皇廟火甲辰孝文廟火上素服五日冬匈奴

單于遣弟左賢王來朝賀

二年春正月立皇子噐爲定陶王

師古曰噐音敖

詔曰廼者鳳

皇甘露降集黃龍登興醴泉滂流枯槁榮茂

師古曰槁音口老反

神光並見咸受禎祥

師古曰禎正也祥福也禎音貞

其赦天下減民算

三十

師古曰一算減錢三十也

賜諸侯王丞相將軍列侯中二千石

金錢各有差賜民爵一級女子百戶牛酒鰥寡孤獨高

年帛夏四月遣護軍都尉祿將兵擊珠崖秋九月立皇

子宇爲東平王冬十二月行幸蕢陽宮

應劭曰宮在鄴秦文王所起伏

儼曰在扶風李斐曰蕢音倍師古曰應說李音是也

屬玉觀

服虔曰以玉飾因名焉在扶風李奇曰屬

玉音鶯鶯其上有此鳥因以爲名晉灼曰屬玉水鳥似鳩鵲以名觀也師古曰晉灼是也屬音之欲反

匈

奴呼韓邪單于款五原塞

師古曰款叩也

願奉國珍朝三年正

月

師古曰欲於甘露三年正月行朝禮

詔有司議咸曰聖王之制施德行

禮先京師而後諸夏先諸夏而後夷狄詩云率禮不越

遂視旣發相土烈烈海外有截

文穎曰遂徧也發行也言契能使其民率禮不

越法度徧承視其教令奉順而行也相土契孫也烈烈威也截整齊也威武之盛烈烈然四海之外率服整齊

也師古曰此商頌長發之詩

陛下聖德克塞天地光被四表

師古曰四表四

方之
外也

匈奴單于鄉風慕義

師古曰鄉
讀曰嚮

舉國同心奉珍朝

賀自古未之有也單于非正朔所加王者所客也禮儀

宜如諸侯王稱臣昧死再拜位次諸侯王下詔曰蓋聞

五帝三王禮所不施不及以政

師古曰言荒外之人非
禮所設者政刑亦不及

今匈奴單于稱北藩臣朝正月朕之不逮德不能弘覆

其以客禮待之位在諸侯王上

三年春正月行幸甘泉郊泰畤匈奴呼韓邪單于稽侯

耨來朝

應劭曰耨音若訕李奇曰耨音山師古
曰稽音古奚反耨音剛又音先安反

贊謁稱

藩臣而不名賜以璽綬冠帶衣裳安車駟馬黃金錦繡

繒絮使有司道單于

師古曰道讀
曰導導引也

先行就邸長安宿長

平上自甘泉宿池陽宮上登長平阪

如淳曰阪名也在池陽南上原之阪

有長平觀去長安五十里師古曰涇水之南原卽今所謂畦城阪也

詔單于毋謁

師古曰不拜見

也其左右當戶之羣皆列觀

孟康曰左右當戶匈奴官名

蠻夷君長

王侯迎者數萬人夾道陳上登渭橋咸稱萬歲單于就

邸置酒建章宮饗賜單于觀以珍寶

師古曰觀示也

二月單于

罷歸遣長樂衛尉高昌侯忠

晉灼曰功臣表董忠

車騎都尉昌

晉灼

曰韓昌

騎都尉虎

文穎曰不知姓晉灼曰百官表唯記三輔郡以上若此皆不見姓無從知之

將萬六千騎送單于單于居幕南保光祿城

孟康曰前光祿徐自

爲所築城

詔北邊振穀食到支單于遠遁

師古曰郵音質

匈奴遂定

詔曰廼者鳳皇集新蔡羣鳥四面行列皆鄉鳳皇立以

萬數

師古曰行音胡
郎反鄉讀曰嚮

其賜汝南太守帛百匹新蔡長吏

三老孝弟力田鰥寡孤獨各有差賜民爵二級毋出今

年租三月己丑丞相霸薨

文穎曰
黃霸

詔諸儒講五經同異

太子太傅蕭望之等平奏其議上親稱制臨決焉廼立

梁丘易大小夏侯尚書穀梁春秋博士冬烏孫公主來

歸

應劭曰楚
王女解憂

四年夏廣川王海陽有罪廢遷房陵冬十月丁卯未央

宮宣室閣火

黃龍元年

應劭曰先是黃龍見新豐因以冠元焉師古
日漢注云此年二月黃龍見廣漢郡故改年

然則應說非也見新豐者於此五載矣。劉攽曰案宣
帝率四年改元而郊祀志先言改元甘露其夏黃龍見

新豐其下乃云後間歲改元黃龍然後又云正月復幸甘泉然則宣帝自追用五年前黃龍改元爾若是年黃龍見史官焉得不書漢注未可據也

春正月行幸甘泉郊泰時匈奴呼韓邪單于來朝禮賜如初二月單于歸國詔曰蓋聞上古

之治君臣同心舉措曲直各得其所

師古曰措置也音干故反

是以

上下和洽海內康平其德弗可及已

師古曰已語終辭

朕旣不

明數申詔公卿大夫務行寬大

師古曰申束也謂約束之

順民所疾

苦

師古曰知所疾苦則順其意也

將欲配三王之隆明先帝之德也今

吏或以不禁姦邪爲寬大縱釋有罪爲不苛或以酷惡

爲賢皆失其中

師古曰中音竹仲反

奉詔宣化如此豈不繆哉方

今天下少事繇役省減兵革不動而民多貧盜賊不止

其咎安在上計簿具文而已

師古曰雖有其文而實不副也簿音步戶反其下亦

同務爲欺謾以避其課

師古曰謾誑言也音慢又音莫連反

三公不以爲

意朕將何任

師古曰言無所委任

諸請詔省卒徒自給者皆止

應劭

曰時有請云詔復出者省卒徒以其直自給不復取稟假雖有進入於官非舊章也故絕之張晏曰先是武帝以用度不足宜有以益官者或奉使求不受奉祿自省其徒衆以取其稟者或自給於是姦吏緣以爲利所得多於本祿故絕之如淳曰是時有所省卒徒而羣臣有請之以自給官府者先時聽與之今更悔之不復聽也師古曰應張

二說是也御史察計簿疑非實者按之使眞僞毋相

亂三月有星孛于王良閣道入紫宮

蘇林曰皆星名

夏四月詔

曰舉廉吏誠欲得其眞也吏六百石位大夫有罪先請

秩祿上通足以效其賢材自今以來毋得舉

韋昭曰吏六百石者

不得復舉
爲廉吏也
冬十二月甲戌帝崩于未央宮

臣瓚曰帝年十八卽位卽

位二十五年
壽四十三

癸巳尊皇太后曰太皇太后

師古曰於此已書尊太皇

太后而元紀之首又重書之然尊太皇太后及皇太后宜同一時則元紀爲是而此紀誤重之

贊曰孝宣之治信賞必罰

師古曰有功必賞有罪必罰

綜核名實政

事文學法理之士咸精其能至于技巧工匠器械自元

成間鮮能及之

師古曰械者器之總名也一曰有盛爲械無盛爲器鮮少也言少有能及之者

鮮音先
踐反

亦足以知吏稱其職民安其業也遭值匈奴乖

亂推亡固存

李奇曰推亡者若紂爲無道天下苦之有滅亡之形周武遂推而赦之固存者譬如

鄰國以道涖民上下一心勢必能存因就而堅固之今匈奴內自奮爭有事故宣帝能朝呼韓邪而固存之走

郅支單于使遠遁是謂推亡也師古曰尚書仲虺之誥曰推亡固存邦乃其昌言有亡道者則推而滅之有存

道者則輔而固之王者如師古曰信讀爲申信威北夷古通用字一說恩

信及威並單于慕義稽首稱藩功光祖宗業垂後嗣可

謂中興侔德殷宗周宣矣師古曰侔等殷之高宗及周宣王也

前漢書卷八

前漢書卷八考證

宣帝紀內謁者令郭穰注○劉敞曰謁字衍○臣召南

按丙吉傳亦作內謁者未必兩文並訛且據百官表謁者署與內者署並屬少府謁字或非衍也

皇太后歸長樂宮○胡三省曰漢太后常居長樂宮皇太后自昌邑之廢居未央宮今宣帝既立復居長樂宮也

自左更至五大夫○劉敞曰緣王卽位九侯率已爲關內侯矣臣召南按兩句俱有訛字宣帝以庶人封侯

卽帝位並未爲王也九侯二字尤不可解據前文自

田廣明以下新封五侯而已以文義推之應作緣帝
卽位九卿率已爲關內侯卽指上文之右扶風德典
屬國武廷尉光宗正德大鴻臚賢等也

秋七月詔立燕刺王太子建爲廣陽王云云。臣召南

按封廣陽王表作五月封廣陵王表作十月

下有司皆自殺注田千秋子也。臣召南按廣明與順

皆姓田而順則千秋子也句上應有順字各本俱誤
脫耳

鳳皇集魯郡。臣召南按魯是時尚爲國不得稱郡通

鑑但云集魯可謂至慎

其罷車騎將軍右將軍屯兵○臣召南按此罷兩將軍

之屯兵非罷將軍官也是時車騎將軍爲張安世右將軍爲霍禹帝此舉以收霍氏權柄耳

復高皇帝功臣云云○通鑑考異曰功臣表詔復家者皆云元康四年其數非一不容盡訛蓋紀訛耳

其益吏百石以下奉十五○通鑑考異曰荀悅漢紀云益吏百石以下俸五十斛蓋以十五難曉故改之然詔云以下恐難指五十斛也

平通侯楊惲坐前爲光祿勳云云○臣召南按惲之死

在四年此時但與戴長樂相告免官耳通鑑考異已

辨此條之誤

丙申太上皇廟火甲辰孝文廟火○

臣照

按兩火字並

應是災字左傳曰火人火之也倘係人火之必記事
實故知並是災字之訛四年未央宮宣室閣火亦然
遣護軍都尉祿將兵擊珠崖○珠崖前後文俱作厓

前漢書卷八考證

前漢書卷九

漢 蘭 臺 令 史班 固撰

唐正議大夫行秘書少監琅邪縣開國子顏師古注

元帝紀第九

孝元皇帝

荀悅曰諱爽之字曰盛應劭曰諡法行義悅民曰元師古曰爽音式亦反

宣帝太

子也母曰共哀許皇后

張晏曰禮婦人從夫諡閱其見殺故兼二諡師古曰共讀曰恭

宣帝微時生民間年二歲宣帝卽位八歲立爲太子

古師

日宣帝卽位之明年改元曰本始本始凡四年而改元日地節地節三年立皇太子若初卽位年二歲則立爲太子時年九歲矣又宣帝以元平元年七月卽位而外戚傳云許后生元帝數月宣帝立爲帝是則卽位時太子未必二歲也參校前後衆文此紀進退爲錯○劉攽日此言年二歲宣帝卽位指論踰年改元爲卽位耳若

春秋諸公也 壯大柔仁好儒見宣帝所用多文法吏以刑名

繩下

晉灼曰刑名家名家也太史公曰法家嚴而少恩名家儉而善失真師古曰晉說非也劉向別錄

云申子學號刑名者以名責實尊君卑臣 崇上抑下宣帝好觀其君臣篇繩謂彈治之耳 大臣楊

惲蓋寬饒等坐刺譏辭語爲罪而誅

師古曰惲音於吻反

嘗侍燕

從容言

師古曰從音千容反

陛下持刑太深宜用儒生宣帝作色

曰

師古曰作動也意怒故動色

漢家自有制度本以霸王道雜之柰

何純任德教用周政乎

師古曰姬周之政

且俗儒不達時宜好

是古非今使人眩於名實

師古曰眩亂視也音胡眇反

不知所守何

足委任迺歎曰亂我家者太子也繇是疏太子而愛淮

陽王

師古曰繇讀與由同

曰淮陽王明察好法宜爲吾子而王母

張健仔尤幸上有意欲用淮陽王代太子然以少依許氏俱從微起故終不肯焉黃龍元年十二月宣帝崩癸

巳太子卽皇帝位謁高廟尊皇太后曰太皇太后

蘇林曰上

官后皇后曰皇太后

文穎曰卬成王皇后母養元帝者也

初元元年春正月辛丑孝宣皇帝葬杜陵

臣瓚曰自崩至葬凡二十

八曰杜陵在長安南五十里也

賜諸侯王公主列侯黃金

○宋祁曰古本無黃字

吏二千石以下錢帛各有差大赦天下三月封皇太后

兄侍中中郎將王舜爲安平侯丙午立皇后王氏以三

輔太常郡國公田及苑可省者振業貧民

師古曰振起之令有作業

貲不滿千錢者賦貸種食

師古曰賦給與之也貸假也貸音土載反種音之勇反

封外祖父平恩戴侯同產弟子中常侍許嘉爲平恩侯

奉戴侯後

文類曰戴侯許廣漢

夏四月詔曰朕承先帝之聖緒獲

奉宗廟戰戰兢兢

○宋祁曰唐本作栗栗

間者地數動而未靜懼

於天地之戒不知所繇

師古曰繇與由同

方田作時朕憂蒸庶

之失業

師古曰蒸衆也

臨遣光祿大夫褒等十二人

應劭曰自臨而約勅

乃遣

循行天下

師古曰行音下更反

存問耆老鰥寡孤獨困乏失

職之民

師古曰失職失其常業

延登賢俊招顯側陋因覽風俗之

化相守二千石誠能正躬勞力

師古曰相者諸侯王相也守郡守也

宣明

教化以親萬姓則六合之內和親庶幾庠無憂矣書不

云乎股肱良哉庶事康哉

師古曰虞書益稷之辭也言君能任賢股肱之臣皆得良

善則衆
事安寧

布告天下使明知朕意又曰關東今年穀不登

民多困乏其令郡國被災害甚者母出租賦江海陂湖

園池屬少府者以假貧民

師古曰
湖深水

勿租賦賜宗室有屬

籍者馬一匹至二駟

師古曰二
駟八匹

三老孝者帛五匹弟者

力田三匹鰥寡孤獨二匹吏民五十戶牛酒

師古曰以
五十戶爲

率共
賜之

六月以民疾疫令大官損膳減樂府員省苑馬以

振困乏秋八月上郡屬國降胡萬餘人亡入匈奴九月

關東郡國十一大水饑或人相食轉旁郡錢穀以相救

詔曰間者陰陽不調黎民饑寒無以保治

師古曰
保安也

惟德

淺薄不足以充入舊貫之居

應劭曰言已德淺薄不足
以充舊貫者常居也師古

日諭語稱閔子騫云仍舊貫帝自謙言其令諸宮館希不足充入先帝之宮室故引以爲言也

御幸者勿繕治

師古曰繕補也

太僕減穀食馬水衡省肉食獸

師古曰減謂損其數省者全去之

二年春正月行幸甘泉郊泰畤賜雲陽民爵一級女子

百戶牛酒立弟竟爲清河王三月立廣陵厲王太子霸

爲王詔罷黃門乘輿狗馬

師古曰黃門近署也故親幸之物屬焉

水衡禁

園宜春下苑

孟康曰宮名也在杜縣東晉灼曰史記云葬二世杜南宜春苑中師古曰宜春下苑

卽今京城東南隅曲江池是

少府飲飛外池

如淳曰漢儀注飲飛具繪繳以射鳧鴈給祭祀

是故有

嚴籩池田

蘇林曰嚴飾池上之屋及其地也晉灼曰嚴籩射苑也許慎曰嚴弋射者

所蔽也池田苑中田也師古曰晉說是

假與貧民詔曰蓋聞賢聖在位陰

陽和風雨時日月光星辰靜黎庶康寧考終厥命

師古曰考

老也言得壽考終其天命

今朕恭承天地託于公侯之上明不能燭

德不能綏災異竝臻連年不息乃二月戊午地震于隴

西郡毀落太上皇廟殿壁木飾壞敗獮道縣城郭官寺

及民室屋壓殺人衆

師古曰獮道屬天水凡府庭所在皆謂之寺獮音完壓音烏狎反

山崩地裂水泉涌出天惟降災震驚朕師

師古曰師衆也

治有

大虧咎至於斯夙夜兢兢不通大變深惟鬱悼未知其

序

師古曰鬱不通之意也序次也

閒者歲數不登元元困乏不勝饑寒

以陷刑辟朕甚閔之郡國被地動災甚者無出租賦赦

天下有可蠲除減省以便萬姓者條奏毋有所諱丞相

御史中二千石舉茂材異等直言極諫之士朕將親覽

焉夏四月丁巳立皇太子賜御史大夫爵關內侯中二

千石右庶長

師古曰第十一爵

天下當爲父後者爵一級列侯

錢各二十萬五大夫十萬

師古曰五大夫第九爵

六月關東饑齊

地人相食秋七月詔曰歲比災害民有菜色

師古曰五穀不收人

但食菜故其顏色變惡

慘怛於心

師古曰慘痛也怛悼也

已詔吏虛倉廩開

府庫振救賜寒者衣今秋禾麥頗傷一年中地再動北

海水溢流殺人民陰陽不和其咎安在公卿將何以憂

之其悉意陳朕過靡有所諱

師古曰悉意盡意也靡無也

冬詔曰國

之將興尊師而重傅故前將軍望之傅朕八年道以經

書厥功茂焉

師古曰茂美也道讀曰導

其賜爵關內侯食邑八百戶

朝朔望十二月中書令弘恭石顯等譖望之令自殺

三年春令諸侯相位在郡守下

師古曰此諸侯謂諸侯王也

珠厓郡

山南縣反博謀羣臣待詔賈捐之以爲宜棄珠厓救民

饑饉

師古曰穀不熟爲饑蔬不熟爲饑蔬菜也

乃罷珠厓夏四月乙未晦茂

陵白鶴館災詔曰迺者火災降於孝武園館朕戰栗恐

懼不燭變異咎在朕躬

師古曰燭照也

羣司又未肯極言朕過

以至於斯將何以寤焉百姓仍遭凶阨無以相振

師古曰仍

頻也

加以煩擾虐苛吏拘牽乎微文不得永終性命

師古曰永

也朕甚閔焉其赦天下夏旱立長沙煬王弟宗爲王

鄭氏

日煬音供
養之養

封故海昏侯賀子代宗爲侯六月詔曰蓋聞

安民之道本繇陰陽

師古曰繇與由同

閒者陰陽錯謬風雨不

時朕之不德庶幾羣公有敢言朕之過者今則不然媮

合苟從未肯極言

師古曰媮與偷同

朕甚閔焉永惟蒸庶之饑

寒

○宋祁曰一本無永字

遠離父母妻子勞於非業之作衛於不

居之宮

師古曰不急之事故云非業也

恐非所以佐陰陽之道也其罷

甘泉建章宮衛令就農

○宋祁曰唐本監本衛字下有各字

百官各省費

師古曰費用之物務減省

條奏毋有所諱有司勉之毋犯四時之禁

丞相御史舉天下明陰陽災異者各三人於是言事者

衆或進擢召見人人自得上意

師古曰人人各自以富天子之意○宋祁

曰人人南本
只一个人字

四年春正月行幸甘泉郊泰畤三月行幸河東祠后土
赦汾陰徒賜民爵一級女子百戶牛酒鰥寡高年帛行
所過無出租賦

五年春正月以周子南君爲周承休侯

文穎曰姓姬名延年其祖父姬

嘉本周後武帝元鼎四年封爲周子南君令奉周祀師古曰承休國在潁川

位次諸侯王三

月行幸雍祠五時夏四月有星孛于參詔曰朕之不逮

序位不明

師古曰逮及也言官人之位失其次序

衆僚久慮

應劭曰慮音曠師古曰慮

古曠字曠空也不得其人則職事空廢

未得其人元元失望上感皇天陰

陽爲變咎流萬民朕甚懼之廼者關東連遭災害饑寒

疾疫天不終命

○宋祁曰刊誤改天作天

詩不云乎凡民有喪匍匐

救之

師古曰邶國谷風之詩也言見人有喪禍之事則當盡力以救之匍音步扶反匍音步得反

其

令大官毋日殺

師古曰不得日日宰殺

所具各減半

師古曰食具也

乘輿

秣馬無乏正事而已

師古曰秣養也以粟秣食之也正事謂駕供郊祀蒐狩之事非游田

者也秣音末

罷角抵上林宮館希御幸者齊三服官

李斐曰齊國舊

有三服之官春獻冠幘縱爲首服統素爲冬服輕綃爲夏服凡三如淳曰地理志曰齊冠帶天下胡公曰服官

主作文繡以給袞龍之服地理志云襄邑亦有服官師古曰齊三服官李說是也縱與纒同音山爾反卽今之

方目縈也統素今之絹也輕綃今之輕縈也襄邑自出文繡非齊三服也

北假田官

李斐曰主假賃

見官田與民收其假稅也故置田農之官晉灼曰匈奴傳秦始皇渡河據陽山北假中王莽傳五原北假膏壤

殖穀北假地名師古曰晉說是也

鹽鐵官常平倉博士

弟子毋置員以廣學者賜宗室子有屬籍者馬一匹至

二駟三老孝者帛人五匹弟者力田三匹鰥寡孤獨二

匹吏民五十戶牛酒省刑罰七十餘事除光祿大夫以

下至郎中保父母同產之令

應劭曰舊時相保一人有過皆當坐之師古曰特爲

郎中以上除此令者所以優之也同產謂兄弟也

令從官給事官司馬中者得

爲大父母父母兄弟通籍

應劭曰從官謂宦者及虎賁羽林太醫太官是也司馬中

者宮內門也司馬主武兵禁之意也籍者爲二尺竹牒記其年紀名字物色縣之宮門案省相應乃得入也師古曰應說非也從官親近天子常侍從者皆是也故此下云科第郎從官司馬門者宮之外門也衛尉有八屯衛侯司馬主衛士徼巡宿衛每面各二司馬故謂宮之外門爲司馬門

冬十二月丁未御

史大夫貢禹卒衛司馬谷吉使匈奴不還

師古曰卽衛尉八屯之衛

司馬

永光元年春正月行幸甘泉郊泰畤赦雲陽徒賜民爵

一級女子百戶牛酒高年帛行所過毋出租賦

○宋祁曰舊本

作毋令出租賦

二月詔丞相御史舉質樸敦厚遜讓有行者光

祿歲以此科第郎從官

師古曰始令丞相御史舉此四科人以擢用之而見在郎及從

官又令光祿每歲依此科考校定其第高下用知其人賢否也

三月詔曰五帝三王任

賢使能以登至平而今不治者豈斯民異哉

師古曰言今所治人

卽五帝三王之衆庶

咎在朕之不明亡以知賢也是故壬人在位

服虔曰壬人佞人也

而吉士雍蔽

師古曰吉善也大雅卷阿之詩曰藹藹王多吉士雍讀曰墜

重以周秦之敝民漸薄俗

師古曰爲薄俗所漸染也重音直用反

去禮義

觸刑法豈不哀哉繇此觀之元元何辜

師古曰繇讀與由同

其赦

天下令厲精自新各務農畝無田者皆假之貸種食如

貧民

師古曰此皆謂遇赦新免罪者也故云如貧民

賜吏六百石以上爵五大

夫勤事吏二級爲父後者民一級

○宋祁曰越本無爲父後者四字

女

子百戶牛酒鰥寡孤獨高年帛是月雨雪

師古曰雨音于其反隕

霜傷麥稼秋罷

如淳曰當言罷某官某事爛脫失之晉灼曰或無稼字或稼字在秋下稼或作

桑或作霖五行志永光元年三月隕霜殺桑九月二日隕霜殺稼天下大饑言傷麥稼秋罷是也師古曰晉說

得之秋者謂秋時所收穀稼也今俗猶謂麥豆之屬爲雜稼云秋罷者言至秋時無所收也○劉攽曰如言爛

是脫

二年春二月詔曰蓋聞唐虞象刑而民不犯

師古曰象刑解在武

紀殷周法行而姦軌服

師古曰軌與宄同亂在外曰姦在內曰軌○宋祁曰法行唐本

法作行

今朕獲承高祖之洪業

○宋祁曰一本無洪字

託位公侯之

上夙夜戰栗永惟百姓之急未嘗有忘焉然而陰陽未

調三光晻昧

師古曰晻與暗同又音烏威反

元元大困流散道路盜賊

竝興有司又長殘賊失牧民之術是皆朕之不明政有

所虧咎至於此朕甚自耻爲民父母若是之薄謂百姓

何

師古曰言何以撫臨百姓

其大赦天下賜民爵一級女子百戶牛

酒鰥寡孤獨高年三老孝弟力田帛又賜諸侯王公主

列侯黃金中二千石以下至中都官長吏各有差吏六

百石以上爵五大夫勤事吏各二級三月壬戌朔日有

蝕之詔曰朕戰戰栗栗夙夜思過失不敢荒寧

師古曰荒廢也

不敢廢事而自寧

惟陰陽不調未燭其咎婁敕公卿日望有效

師古曰婁古屢字其後亦同

至今有司執政未得其中

師古曰中音竹仲反

施

與禁切未合民心

師古曰施惠福薄禁令煩苛

暴猛之俗彌長和睦

之道日衰百姓愁苦靡所錯躬

師古曰錯置也音干故反

是以氛邪

歲增侵犯太陽

師古曰氛惡氣也邪者言非正氣也太陽日也

正氣湛掩日久

奪光

師古曰湛讀與沈同湛掩者見掩而湛沒

迺壬戌日有蝕之天見大異

以戒朕躬

師古曰見顯示

朕甚悼焉其令內郡國舉茂材異等

賢良直言之士各一人夏六月詔曰閒者連年不收四

方咸困元元之民勞於耕耘又亡成功困於饑饉亡以

相救朕爲民父母德不能覆而有其刑甚自傷焉其赦
天下秋七月西羌反遣右將軍馮奉世擊之八月以太
常任千秋爲奮威將軍別將五校竝進

師古曰別領五校之兵而與右

將軍
竝進

三年春西羌平軍罷三月立皇子康爲濟陽王夏四月

癸未大司馬車騎將軍接薨

師古曰王接

冬十一月詔曰迺

者已丑地動中冬雨水大霧

師古曰中讀曰仲雨音于具反

盜賊竝起

吏何不以時禁各悉意對

師古曰時禁謂月令所當禁斷者也悉盡也

冬復

鹽鐵官博士弟子員

師古曰復音扶目反

以用度不足民多復除

師古曰復音方目反

無以給中外繇役

四年春二月詔曰朕承至尊之重不能燭理百姓婁遭

凶咎加以邊竟不安師旅在外

師古曰婁讀曰屢竟讀曰境

賦歛轉

輸元元騷動窮困亡聊犯法抵罪夫上失其道而繩下

以深刑朕甚痛之其赦天下所貸貧民勿收責三月行

幸雍祠五時夏六月甲戌孝宣園東闕災戊寅晦日有

蝕之詔曰蓋聞明王在上忠賢布職則羣生和樂方外

蒙澤今朕掩于王道

師古曰掩讀與暗同

夙夜憂勞不通其理靡

瞻不眩靡聽不惑

師古曰靡無也眩視亂也音胡眄反

是以政令多還民

心未得

李奇曰還反也易曰渙汗其大號言王者發號施令如汗出不可復反

邪說空進

事亡成功此天下所著聞也公卿大夫好惡不同

師古曰愛

憎各異也

或緣姦作邪侵削細民元元安所歸命哉廼六月

晦日有蝕之詩不云虘今此下民亦孔之哀

師古曰小雅十月之

交之詩也孔甚也言災異既多百姓甚可哀愍

自今以來公卿大夫其勉思天

戒慎身脩永以輔朕之不逮

師古曰虞書咎繇謨云慎厥身脩思永言當慎脩其

身思爲長久之道故此詔云慎身脩永也今流俗書本承上有職字者後人不曉妄加之耳

直言盡

意無有所諱九月戊子罷衛思后園及戾園

服虔曰戾太子母也

冬十月乙丑罷祖宗廟在郡國者諸陵分屬三輔

師古曰先

是諸陵摠屬太常今各依其地界屬三輔

以渭城壽陵亭部原上爲初陵

服虔

曰元帝初置陵未有名也故曰初

詔曰安土重遷黎民之性

師古曰骨重難也

肉相附人情所願也項者有司緣臣子之義奏徙郡國

民以奉園陵令百姓遠棄先祖墳墓破業失產親戚別

離人懷思慕之心家有不安之意是以東垂被虛耗之

害關中有無聊之民

師古曰耗損也音呼到反

非久長之策也詩不

云虘民亦勞止迄可小康惠此中國以綏四方

師古曰大雅民

勞之詩也止語助也迄至也康安也言人勞已久至此可以小安逸之施惠京師以及四遠也

今所爲

初陵者勿置縣邑使天下咸安土樂業亡有動搖之心

布告天下令明知之又罷先后父母奉邑

應劭曰先后爲其父母置

邑守冢以奉祭祀既已久遠又非典制故罷之師古曰奉邑奉音扶用反

五年春正月行幸甘泉郊泰畤三月上幸河東祠后土

秋潁川水出流殺人民吏從官縣被害者與告

晉灼曰從官猶

從役從軍也臣瓚曰告休假也師古曰晉說非也從官
卽上侍從之官也言凡爲吏爲從官其本縣有被害者
皆與士卒遣歸冬上幸長楊射熊館師古曰射
音食亦反布車騎

大獵十二月乙酉毀太上皇孝惠皇帝寢廟園

建昭元年春三月上幸雍祠五時秋八月有白蛾羣飛

蔽日從東都門至枳道

如淳曰三輔黃圖長安城東面
北頭門號曰宣平城門其外郭

日東都門也師古曰蛾成羣若今之蠶蛾類也音五何
反枳音只枳道解在高紀○宋祁曰顏注南本唐本竝
無成羣二字冬河間王元有罪廢遷房陵罷孝文太后孝昭

太后寢園

二年春正月行幸甘泉郊泰畤三月行幸河東祠后土
益三河大郡太守秩戶十二萬爲大郡夏四月赦天下

六月立皇子興爲信都王

○宋祁曰興越本作興子據表傳作興是

閏月丁

酉太皇太后上官氏崩冬十一月齊楚地震大雨雪

師古

日雨音于具反

樹折屋壞淮陽王舅張博魏郡太守京房坐窺

道諸侯王以邪意漏泄省中語

師古曰道讀曰導

博要斬房棄

市

三年夏令三輔都尉

○宋祁曰唐本無都字

大郡都尉

○宋祁曰舊本南本

唐本竝無郡字刊誤添

秩皆二千石六月甲辰丞相立成薨

師古曰韋

立成秋使護西域騎都尉甘延壽副校尉陳湯

師古曰言延壽及湯

本充西域之使故先言使而後序其官職及姓名

橋發戊己校尉屯田吏士及

西域胡兵攻郅支單于

師古曰橋與矯同矯託也實不奉詔詐以上命發兵故言橋發

也戊己校尉者鎮安西域無常治處亦猶甲乙等各有
方位而戊與己四李寄王故以名官也時有戊校尉又
有己校尉一說戊己位在中央今所置校尉處三十六國之中故曰戊己也郵音質冬斬其首傳

詣京師縣蠻夷邸門

師古曰縣古懸字也蠻夷邸若今鴻臚客館○宋祁曰唐本無門字

四年春正月以誅郅支單于告祠郊廟赦天下羣臣上

壽置酒以其圖書示後宮貴人

服虔曰討郅支之圖書也或曰單于土地山川

之形書也師古曰或說非

夏四月詔曰朕承先帝之休烈

師古曰休美也烈業

也風夜栗栗懼不克任閒者陰陽不調

○宋祁曰不唐本作未五

行失序百姓饑饉惟蒸庶之失業臨遣諫大夫博士賞

等二十一人循行天下

師古曰行音下更反

存問耆老鰥寡孤獨

乏困失職之人舉茂材特立之士相將九卿其帥意毋

怠使朕獲觀教化之流焉六月甲申中山王竟薨藍田

地沙石雍霸水安陵岸崩雍涇水水逆流

孟康曰安陵岸惠帝陵旁

涇水岸也師古曰雍讀曰壅

五年春三月詔曰蓋聞明王之治國也明好惡而定去

就崇敬讓而民興行故法設而民不犯令施而民從今

朕獲保宗廟兢兢業業匪敢解怠

師古曰兢兢慎也業業危也解讀曰懈

德薄明掩教化淺微

師古曰掩讀與暗同

傳不云虛百姓有過在

予一人

師古曰論語載殷湯伐桀告天下之文也言君天下者當任其憂責

其赦天下賜

民爵一級女子百戶牛酒三老孝弟力田帛又曰方春

農桑興百姓勩力自盡之時也故是月勞農勸民無使

後時

師古曰勞農謂慰勉之勞音來到反

今不良之吏覆案小罪

師古曰覆音方

目反○宋祁曰唐本無之字

徵召證案與不急之事以妨百姓使失

一時之作亡終歲之功公卿其明察申救之

師古曰申重也一日

約束之耳

夏六月庚申復戾園壬申晦日有蝕之秋七月庚

子復太上皇寢廟園原廟

文穎曰高祖已自有廟在長安城中惠帝更於渭北作廟

謂之原廟爾雅曰原者再再作廟也晉灼曰原本也始祖之廟故日本也師古曰文說是

昭靈后武

哀王昭哀后衛思后園

師古曰昭靈后高祖母也武哀王高祖兄也昭哀后高祖姊也

衛思后戾太子母也

竟寧元年

應劭曰虜韓邪單于願保塞邊竟得以安寧故以冠元也師古曰據如應說竟讀爲境古

之用字竟境實同但此詔云邊垂長無兵革之事竟者終極之言言永安寧也既無兵革中外安寧豈止境上

若依本字而讀
義更引通也

春正月匈奴虜韓邪單于來朝

宋祁曰
虜當作

呼

詔曰匈奴郅支單于背叛禮義既伏其辜虜韓邪單

于不忘恩德鄉慕禮義

師古曰鄉
讀曰嚮

復修朝賀之禮願保

塞傳之無窮邊垂長無兵革之事其改元爲竟寧賜單

于待詔掖庭王穡爲關氏

應劭曰郡國獻女未御見須
命於掖庭故曰待詔王穡王

氏女名穡字昭君文穎曰本南郡秭歸人也蘇
林曰關氏音焉支如漢皇后也師古曰秭音姊

皇太子

冠賜列侯嗣子爵五大夫

師古曰
第九爵

天下爲父後者爵一

級二月御史大夫延壽卒

師古曰卽繁延壽
也繁音蒲何反

三月癸未

復孝惠皇帝寢廟園孝文太后孝昭太后寢園夏封騎

都尉甘延壽爲列侯賜副校尉陳湯爵關內侯黃金百

斤五月壬辰帝崩于未央宮

臣瓚曰帝年二十七卽位卽位十六年壽四十三

毀太上皇孝惠孝景皇帝廟罷孝文孝昭太后昭靈后

武哀王昭哀后寢園秋七月丙戌葬渭陵

臣瓚曰自崩及葬凡五十

五日渭陵在長安北五十六里也

贊曰臣外祖兄弟爲元帝侍中

應劭曰元成帝絕皆班固父彪所作臣則彪自

說也外祖金敞也如淳曰班固外祖樊叔皮也師古曰應說是

語臣曰元帝多材藝善

史書

應劭曰周宣王太史史籀所作大篆

鼓琴瑟吹洞簫

如淳曰簫之無底者

自度

曲被歌聲

應劭曰自隱度作新曲因持新曲以爲歌詩聲也荀悅曰被聲能播樂也臣瓚曰度曲謂

歌終更授其次謂之度曲西京賦曰度曲未終雲起雪飛張衡舞賦度終復位次受二八師古曰應荀二說皆

是也度音大各反被音皮義反

分刊節度

蘇林曰刊度也知曲之終始節度也韋昭曰刊切也謂能

分切句絕爲之節制也師古窮極幼眇師古曰幼眇讀曰要妙少

而好儒及卽位徵用儒生委之以政貢薛韋匡迭爲宰

相

師古曰貢禹薛廣德韋賢匡衡迭互而爲丞相也迭音大結反

而上牽制文義優游

不斷

師古曰爲文義所牽制故不斷決

孝宣之業衰焉然寬弘盡下出

於恭儉號令溫雅有古之風烈

前漢書卷九

前漢書卷九考證

元帝紀以三輔太常郡國公田及苑○胡三省曰太常掌諸陵邑故亦有公田及苑

中常侍許嘉○胡三省曰按表侍中中常侍皆加官西都叅用士人東都以宦者爲中常侍

北假田官○臣召南按水經注曰自高闕以東夾山帶河陽山以西皆北假也

詔丞相御史舉質樸敦厚遜讓有行者光祿歲以此科第郎從官注○臣召南按所云舉光祿四行者卽起

于此後漢書吳祐以光祿四行遷膠東侯相注引漢

官儀曰淳厚質樸遜讓節儉也蓋漢時朝廷從官俱屬光祿勳自太中大夫中大夫諫大夫及郎議郎中郎侍郎郎中其員多至千人故令光祿勳第其賢否以太常任千秋爲奮威將軍○按馮奉世傳作奮武將軍

贊貢薛韋匡迭爲宰相○

臣召南

按貢禹薛廣德止爲

御史大夫而贊與韋匡並列漢世以御史大夫爲丞相之副故與丞相並稱兩府其後改丞相曰司徒改御史大夫曰司空遂並爲三公矣蕭望之嘗爲御史大夫後爲前將軍曰吾備位將相亦是此義

前漢書卷九考證

前漢書卷十

漢 蘭 臺 令 史班 固撰

唐正議大夫行秘書少監琅邪縣開國子顏師古注

成帝紀第十

孝成皇帝

荀悅曰諱驚字太孫驚之字曰俊應劭曰元
諡法安民立政曰成師古曰驚音五到反

帝太子也母曰王皇后元帝在太子宫生甲觀畫堂應劭

曰甲觀在太子宫甲地主用乳生也畫堂畫九子母如
淳曰甲觀觀名畫堂堂名三輔黃圖云太子宫有甲觀

師古曰甲者甲乙丙丁之次也元后傳言見於丙殿此
其例也而應氏以爲在宮之甲地謬矣畫堂但畫飾耳

豈必九子母乎霍光止畫室中
是則宮殿中通有綵畫之堂室爲世嫡皇孫宣帝愛之

字曰太孫常置左右年三歲而宣帝崩元帝卽位帝爲

太子壯好經書寬博謹慎初居桂宮

師古曰三輔黃圖桂宮在城中近北

宮非太子宮

上嘗急召太子出龍樓門

張晏曰門樓上有銅龍若白鶴飛廉之爲

名也不敢絕馳道

應劭曰馳道天子所行道也若今之中道師古曰絕橫度也

西至直

城門

晉灼曰黃圖西出南頭第二門也

得絕乃度還入作室門上遲之

問其故以狀對上大說

師古曰說讀曰悅

乃著令令太子得絕

馳道云

師古曰言云者此舉著令之文

其後幸酒樂燕樂

晉灼曰幸酒好酒也樂燕

沈譙也師古曰幸酒晉說是也樂燕樂者論語稱孔子云損者三樂樂驕樂樂逸遊樂燕樂損矣燕樂燕私之

樂也上樂讀如本字又音五孝反下樂音來各反今流俗本無下樂字後人不曉輒去之

上不以為

能而定陶恭王有材甄母傅昭儀又愛幸上以故常有

意欲以恭王爲嗣賴侍中史丹護太子家輔助有力上

亦以先帝尤愛太子故得無廢竟寧元年五月元帝崩
六月己未太子卽皇帝位謁高廟尊皇太后曰太皇太
后皇后曰皇太后以元舅侍中衛尉陽平侯王鳳爲大
司馬大將軍領尚書事乙未有司言乘輿車牛馬禽獸
皆非禮不宜以葬奏可七月大赦天下

建始元年春正月乙丑皇曾祖悼考廟災

文穎曰宣帝父史皇孫廟

立故河間王弟上郡庫令良爲王

如淳曰漢官北邊郡庫官之兵器所藏故

置有星孛于營室罷上林詔獄

師古曰漢舊儀云上林詔獄主治苑中禽獸宮

館事屬水衡

二月右將軍長史姚尹等使匈奴還去塞百餘

里暴風火發燒殺尹等七人賜諸侯王丞相將軍列侯

王太后公主王主

張晏曰天子女曰公主秩比公也王主王之女也師古曰王主則翁主也

王自主婚故曰王主

吏二千石黃金宗室諸官吏千石以下至二

百石及宗室子有屬籍者三老孝弟力田鰥寡孤獨錢

帛各有差吏民五十戶牛酒詔曰廼者火災降於祖廟

有星孛于東方始正而虧

如淳曰言始卽帝之正而有彗星之虧也

咎孰大

焉

師古曰孰有大於此者孰誰也

書云惟先假王正厥事

師古曰商書高宗彤日載

武丁之臣祖己之辭也假至也言先古至道之君遭遇災變則正其行事修德以應之

羣公孜孜

帥先百寮輔朕不逮

師古曰孜孜不怠之意孜音茲

崇寬大長和睦凡

事恕己毋行苛刻

師古曰恕者仁也己之心以度於物

其大赦天下使

得自新封舅諸吏光祿大夫關內侯王崇爲安成侯

應劭

曰百官表諸吏得舉法案劾職如御史中丞武帝初賜
置皆兼官所加或列侯將軍卿大夫爲之無員也

舅王譚商立根逢時爵關內侯夏四月黃霧四塞博問

公卿大夫無有所諱六月有青蠅無萬數

師古曰言其極多雖欲以

萬數計之而不可得故云無萬數

集未央宮殿中朝者坐

服虔曰公卿以下朝會坐

也晉灼曰內朝臣之朝坐也師古曰朝臣坐之在宮殿中者也服說是矣坐音才臥反

秋罷上林

宮館希御幸者二十五所八月有兩月相承晨見東方

服虔曰相承在上下也應劭曰案京房易傳云君弱如婦爲陰所乘則兩月出

九月戊子流星

光燭地長四五丈委曲蛇形貫紫宮十二月作長安南

北郊罷甘泉汾陰祠是日大風拔甘泉時中大木十章

以上

師古曰章與圍同

郡國被災什四以上毋收田租

師古曰什四謂

田畝所收
十損其四

二年春正月罷雍五畚辛巳上始郊祀長安南郊詔曰

廼者徙泰畚后土于南郊北郊朕親飭躬郊祀上帝師古

日飭整也讀與勅同皇天報應神光並見三輔長無共張繇役之

勞師古曰共音居用反張音竹亮反謂供具張設他皆類此○宋祁曰姚本注云漢每上雍祀甘泉有千乘

萬騎置頓之勞今移祀于南郊郊故有共帳繇役也赦奉郊縣長安長陵應劭曰天郊在

長安城南地郊在長安城北長陵界中二縣有奉郊之勤故一切並赦之及中都官耐罪徒

師古曰中都官京師諸官府減天下賦錢算四十孟康曰本算百二十今減四十爲八

十閏月以渭城延陵亭部爲初陵二月詔三輔內郡舉

賢良方正各一人師古曰內郡謂非邊郡三月北宮井水溢出辛

丑上始祠后土于北郊丙午立皇后許氏

師古曰許嘉女

罷六

廐技巧官

服虔曰倡技巧者也師古曰謂巧藝之技耳非倡樂之技也

夏大旱東平

王宇有罪削樊亢父縣

師古曰樊及亢父東平之二縣也亢音抗父音甫

秋罷

太子博望苑

文穎曰武帝爲衛太子作此苑令受賓客也

以賜宗室朝請者

師古曰講音才性反

減乘輿廐馬

三年春三月赦天下徒賜孝弟力田爵二級諸逋租賦

所振貸勿收秋關內大水七月虜上小女陳持弓聞大

水至走入橫城門闌入尙方掖門

服虔曰虜音斯應劭曰虜上地名在渭水

邊陳姓也持弓名也無符籍妄入官曰闌掖門者正門之傍小門也如淳曰橫音光三輔皇圖北面西頭第一

門師古曰掖門在兩傍言如人臂掖也

至未央宮鈎盾中吏民驚上城九

月詔曰廼者郡國被水災流殺人民多至于數京師無

故訛言大水至

師古曰訛僞言

吏民驚恐奔走乘城

師古曰乘登也

殆

苛暴深刻之吏未息元元寃失職者衆

師古曰職常也失其常業

遣

諫大夫林等循行天下

師古曰行音下更反

冬十二月戊申朔日

有蝕之夜地震未央宮殿下詔曰蓋聞天生衆民不能

相治爲之立君以統理之君道得則草木昆蟲咸得其

所

師古曰昆衆也昆蟲言衆蟲也又許慎說文云二虫爲蝨讀與昆同謂虫之總名兩義並通而鄭康成以

昆蟲爲明蟲失之矣虫音許尾反

人君不德譎見天地

師古曰言天地見變所以責之

災異婁發以告不治

師古曰婁古屢字也治音丈吏反

朕涉道日寡舉

錯不中

師古曰中當也音竹仲反

乃戊申日蝕地震朕甚懼焉公卿

其各思朕過失明白陳之女無面從退有後言

師古曰虞書益

稷之篇云帝曰子違汝弼汝無面從退有後言謂我有違道汝當正之無得對面則順從唯唯退後則有諂

之言也故此詔引之丞相御史與將軍列侯中二千石及內郡國

舉賢良方正能直言極諫之士詣公車朕將覽焉越雋

山崩

四年春罷中書宦官

臣瓚曰漢初中人有中謁者令孝武加中謁者令爲中書謁者令置

僕射宣帝時任中書官弘恭爲令石顯爲僕射元帝卽位數年恭死顯代爲中書令專權用事至成帝乃罷其

官初置尚書員五人

師古曰漢舊儀云尚書四人爲四曹常侍尚書主丞相御史事二千

石尚書主刺史二千石事戶曹尚書主庶人上書事主客尚書主外國事成帝置五人有三公曹主斷獄事

夏四月雨雪

師古曰雨音于具反

五月中謁者丞陳臨殺司隸校

尉轅豐於殿中

應劭曰豐爲長安令治有能名擢拜司隸校尉臨素與豐有怨見其尊顯畏爲

已害拜訖未出使人刺殺

秋桃李實大水河決東郡金隄

師古曰金隄者河隄

之名今在滑州界

冬十月御史大夫尹忠以河決不憂職自殺

河平元年春三月詔曰河決東郡流漂二州

師古曰兗州豫州之

地校尉王延世隄塞輒平其改元爲河平賜天下吏民

爵各有差夏四月己亥晦日有蝕之既詔曰朕獲保宗

廟戰戰栗栗未能奉稱

師古曰謂不副先帝之業

傳曰男教不修陽

事不得則日爲之蝕天著厥異辜在朕躬公卿大夫其

勉悉心以輔不逮

師古曰悉盡也逮及也

百寮各修其職惇任仁

人退遠殘賊

師古曰惇厚也遠離也遠音于萬反

陳朕過失無有所諱大

赦天下六月罷典屬國并大鴻臚秋九月復太上皇寢
廟園

二年春正月沛郡鐵官冶鐵飛語在五行志夏六月封
舅譚商立根逢時皆爲列侯

三年春二月丙戌犍爲地震山崩師古曰犍音其
言反又其連反雍江

水水逆流師古曰雍音
壅其下皆同秋八月乙卯晦日有蝕之光祿

大夫劉向校中祕書師古曰言
中以別外謁者陳農使使求遺書

於天下師古曰言令陳農爲使而使之求遺
書也上使音所吏反下使讀如本字

四年春正月匈奴單于來朝赦天下徒賜孝弟力田爵
二級諸逋租賦所振貸勿收二月單于罷歸國三月癸

丑朔日有蝕之遣光祿大夫博士嘉等十一人行舉瀕

河之郡

師古曰巡行而舉其狀也瀕水厓也瀕河言傍河也行音下更反瀕音頻又音賓傍音布浪反

水所毀傷困乏不能自存者財振貸

師古曰財與裁同謂量其等差而振

貸其爲水所流壓死不能自葬令郡國給椁槨葬埋師古

曰椁槨謂小棺椁音衛槨音讀

已葬者與錢人二千避水它郡國在所

冗食之

文穎曰冗散也散廩食使生活不占著戶給役使也如淳曰散著人間給食之官償其直也師

古曰文說是也冗音如勇反食讀曰飢

謹遇以文理無令失職

師古曰勿使失其常

理舉惇厚有行能直言之士壬申長陵臨涇岸崩雍涇

水夏六月庚戌楚王囂薨山陽火生石中改元爲陽朔

陽朔元年

應劭曰時陰盛陽微故改元曰陽朔欲陽之蘇息也師古曰應說非也朔始也以火生石

中言陽氣之始

春二月丁未晦日有蝕之三月赦天下徒冬京

兆尹王章有罪下獄死

二年春寒詔曰昔在帝堯立義和之官

應劭曰尚書堯典曰乃命羲和

羲氏和氏世掌天地之官

命以四時之事令不失其序故書云黎民

於蕃時雍

應劭曰黎眾也時是也雍和也言眾民於是變化用是太和也韋昭曰蕃多也師古曰此

虞書堯典之辭也今尚書作變而此紀作蕃兩說並通蕃音扶元反

明以陰陽爲本也今

公卿大夫或不信陰陽薄而小之

師古曰謂爲輕小之事也

所奏請

多違時政

李奇曰時政月令也

傳以不知周行天下

如淳曰在位者皆不知陰

陽時政轉轉相因故令後人遂不知也師古曰如說非也言遞相因循以所不知之事施設教命周徧天下

而欲望陰陽和調豈不謬哉其務順四時月令三月大

赦天下夏五月

○宋祁曰古本無夏字

除吏八百石五百石秩

李奇

日除八百就六百除五百就四百

秋關東大水流民欲入函谷天井壺

口五阮關者勿苛留

應劭曰天井在上黨高都壺口在壺關五阮在代郡如淳曰阮音近

卷反師古曰苛細刻也阮音其遠反苛音河

遣諫大夫博士分行視

師古曰行音下

更反八月甲申定陶王康薨九月奉使者不稱

師古曰不副上意

詔曰古之立太學將以傳先王之業流化於天下也儒

林之官四海淵原宜皆明於古今溫故知新通達國體

師古曰溫厚也謂厚積於故事也

故謂之博士否則學者無述焉爲下

所輕非所以尊道德也工欲善其事必先利其器

師古曰論

語載孔子之言也故此詔引焉

丞相御史其與中二千石二千石雜舉

可充博士位者使卓然可觀

師古曰卓然高遠之貌也

是歲御史大

夫張忠卒

師古曰史不記其月故書之於歲末其下王駿亦同

三年春三月壬戌隕石東郡八夏六月潁川鐵官徒申

屠聖等百八十人殺長吏盜庫兵自稱將軍經歷九郡

遣丞相長史御史中丞逐捕以軍興從事皆伏辜

師古曰逐

捕之事須有發興皆依軍法

秋八月丁巳大司馬大將軍王鳳薨

四年春正月詔曰夫洪範八政以食爲首

師古曰洪範尚書篇名箕

子爲周武王所說洪大也範法也八政一曰食蓋王政之所先故以爲首

斯誠家給刑錯之

本也

師古曰言倉廩克盈則家家自足人不犯禁無所用刑也

先帝劭農

蘇林曰劭音翹精異

之意也晉灼曰劭勸勉也師古曰晉說是也其字從力音時召反

薄其租稅寵其強力

師古曰謂優寵力田之人

令與孝弟同科

師古曰謂每同薦舉及加賜也

間者民彌

惰怠鄉本者少趨末者衆將何以矯之

師古曰鄉讀曰嚮矯正也方

東作時

應劭曰東作耕也師古曰春位在東耕者始作故曰東作虞書堯典曰平秩東作

其令

二千石勉勸農桑出入阡陌致勞來之

師古曰阡陌田間道也南北曰

阡東西曰陌蓋秦時商鞅所開也勞來勸勉之意也勞音郎到反來音郎代反

書不云乎服田

力嗇乃亦有秋

應劭曰農夫服田厲其膂力乃有秋收也師古曰此商書盤庚之辭

其勗

之哉二月赦天下秋九月壬申東平王宇薨閏月壬戌

御史大夫于永卒

師古曰于定國子

鴻嘉元年春二月詔曰朕承天地獲保宗廟明有所蔽

德不能綏刑罰不中衆寃失職趨闕告訴者不絕是以

陰陽錯謬寒暑失序

師古曰序次也

日月不光百姓蒙辜朕甚

閔焉

師古曰蒙被也

書不云乎卽我御事罔克耆壽咎在厥躬

文穎曰此尚書文侯之命篇中辭也言我周家用事者無能有耆老賢者使國之危亡罪咎在其用事者也師古曰咎在厥躬平王自謂故帝引之以自責耳文氏乃云咎在用事斯失之矣方春生長時臨

遣諫大夫理等

師古曰天子自臨敕而遣

舉三輔三河弘農寃獄公

卿大夫部刺史明申敕守相稱朕意焉其賜天下民爵一級女子百戶牛酒加賜鰥寡孤獨高年帛逋貸未入

者勿收壬午行幸初陵赦作徒

師古曰徒人之在陵作役者

以新豐

戲鄉爲昌陵縣

師古曰戲水之鄉也音許宜反

奉初陵賜百戶牛酒上

始爲微行出

張晏曰於後門出從期門郎及私奴客十餘人白衣組纁單騎出入市里不復警蹕

若微賤之所爲故曰微行

冬黃龍見真定

師古曰日本趙國東垣縣也高祖十一年更名真定

二年春行幸雲陽三月博士行飲酒禮有雉蜚集于庭

歷階升堂而雉

師古曰蜚古飛字也歷階謂以次而登也○宋祁曰歷階唐本作歷陛

後

集諸府又集承明殿

師古曰在未央宮中

詔曰古之選賢傳納以

言明試以功

師古曰傳讀曰敷敷陳也令其陳言而省納之乃試以事也

故官無廢

事下無逸民

師古曰逸遁也

教化流行風雨和時百穀用成衆

庶樂業咸以康寧朕承鴻業十有餘年數遭水旱疾疫

之災黎民婁困於饑寒

師古曰婁古屢字

而望禮義之興豈不

難哉朕旣無以率道

師古曰道讀曰導

帝王之道日以陵夷

師古

曰陵丘陵也夷平也言其頽替若丘陵之漸平也又曰陵遲亦言如丘陵之逶遲稍卑下也他皆類此

意

廼招賢選士之路鬱滯而不通與

師古曰與讀日歟

將舉者未

得其人也其舉敦厚有行義能直言者冀聞切言嘉謀

匡朕之不逮夏徙郡國豪傑貲五百萬以上五千戶于

昌陵賜丞相御史將軍列侯公主中二千石冢地第宅

師古曰並於昌陵賜之

六月立中山憲王孫雲客爲廣德王

三年夏四月赦天下令吏民得買爵賈級千錢

師古曰賈讀日

價大旱秋八月乙卯孝景廟闕災冬十一月甲寅皇后

許氏廢廣漢男子鄭躬等六十餘人攻官寺篡囚徒

師古

日逆取

盜庫兵自稱山君

四年春正月詔曰數敕有司務行寬大而禁苛暴訖今

不改一人有辜舉宗拘繫農民失業怨恨者衆傷害和

氣水旱爲災關東流冗者衆

師古曰冗散失其事業也冗音人勇反

青幽

冀部尤劇朕甚痛焉未聞在位有惻然者孰當助朕憂

之

師古曰孰誰也

已遣使者循行郡國

師古曰行音下更反

被災害什四

以上民貲不滿三萬勿出租賦逋貸未入皆勿收流民

欲入關輒籍內

師古曰錄其民籍而內之

所之郡國謹遇以理

師古曰之

往也務有以全活之思稱朕意秋勃海清河河溢被災者

振貸之冬廣漢鄭躬等黨與寢廣

師古曰寢古浸字浸漸也

犯歷四

縣衆且萬人拜河東都尉趙護爲廣漢太守發郡中及

蜀郡合三萬人擊之或相捕斬除罪

師古曰賦黨相捕斬而來者赦其本

罪

旬月平遷護爲執金吾賜黃金百斤

永始元年春正月癸丑太官凌室火

師古曰藏冰之室

戊午戾

后園關火夏四月封婕妤趙氏父臨爲成陽侯五月封

舅曼子侍中騎都尉光祿大夫王莽爲新都侯六月丙

寅立皇后趙氏

師古曰趙飛燕也卽上所謂婕妤好趙氏

大赦天下秋七月

詔曰朕執德不固謀不盡下

師古曰言不過聽將作大博謀於羣下

過聽將作大

匠萬年

師古曰過誤也萬年解萬年也

言昌陵三年可成作治五年中

陵司馬殿門內尚未加功

如淳曰陵中有司馬殿門如生時制也臣瓚曰天子之藏

擴中無司馬殿門也此謂陵上寢殿及司馬門也時皆未作之故曰尚未加功師古曰中陵陵中正寢也司馬

殿門內瓚說是也

天下虛耗

師古曰耗損也音呼到反

百姓罷勞

師古曰罷讀曰疲

客土疏惡

服虔曰取他處土以增高爲客土也

終不可成朕惟其難怛然

傷心

師古曰惟思也

夫過而不改是謂過矣

師古曰論語載孔子之言故詔引之

其罷昌陵及故陵勿徙吏民令天下毋有勸搖之心立

城陽孝王子俚爲王

如淳曰俚音里

八月丁丑太皇太后王氏

崩

師古曰宣帝王皇后也

二年春正月己丑大司馬車騎將軍王音薨二月癸未

夜星隕如雨乙酉晦日有蝕之詔曰乃者龍見于東萊

日有蝕之天著變異以顯朕郵

師古曰郵與尤同謂過也

朕甚懼焉

公卿申敕百寮深思天誠有可省減便安百姓者條奏

所振貸貧民勿收又曰關東比歲不登

師古曰比類也

吏民以

義收食貧民入穀物助縣官振贍者已賜直

如淳曰賜之爵復租

賦以爲直師古曰此說非也收食貧人謂收取而養食之助縣官振贍謂出物以助郡縣之官也已賜直謂官

賜其所費直也今方更加爵及免賦耳食讀曰飢

其百萬以上加賜爵右更

師古

日第十四爵也

更音工衡反欲爲吏補三百石其吏也遷二等

師古曰先

已爲吏則

遷二等三十萬以上賜爵五大夫

師古曰第九爵也

吏亦遷

二等民補郎十萬以上家無出租賦三歲萬錢以上一

年冬十一月行幸雍祠五時十二月詔曰前將作大匠

萬年知昌陵卑下不可爲萬歲居奏請營作建置郭邑

妄爲巧詐積土增高多賦歛繇役興卒暴之作

師古曰卒讀曰

粹謂急也

卒徒蒙辜死者連屬

師古曰屬音之欲反

百姓罷極天下匱

竭

師古曰罷讀曰疲
匱空也竭盡也

常侍閣前爲大司農中丞數奏昌

陵不可成

師古曰閣
王閣也

侍中衛尉長數白宜早止徙家反

故處

師古曰長
淳于長也

朕以長言下閣章

如淳曰以衛尉長數
白罷故因下閣請奏

罷作之章師古
曰下音胡稼反

公卿議者皆合長計首建至策閣典主

省大費

師古曰司農中丞主
錢穀顧庸故云典主

民以康寧閣前賜爵關內

侯黃金百斤其賜長爵關內侯食邑千戶閣五百戶萬

年佞邪不忠毒流衆庶海內怨望至今不息雖蒙赦令

不宜居京師其徙萬年敦煌郡是歲御史大夫王駿卒

師古曰王
吉之子也

三年春正月己卯晦日有蝕之詔曰天災仍重朕甚懼

焉

師古曰仍頻也
重音直用反

惟民之失職

師古曰失其常業也

臨遣太中大

夫嘉等循行天下

師古曰行音下更反

存問耆老民所疾苦其與

部刺史舉惇樸遜讓有行義者各一人冬十月庚辰皇

太后詔有司復甘泉泰畤汾陰后土雍五畤陳倉陳寶

祠

師古曰陳寶祠在陳倉

語在郊祀志十一月尉氏男子樊並等

十三人謀反

師古曰尉氏陳留之縣

殺陳留太守劫畧吏民自稱

將軍徒李譚等五人共格殺並等皆封爲列侯十二月

山陽鐵官徒蘇令等二百二十八人攻殺長吏盜庫兵

自稱將軍經歷郡國十九殺東郡太守汝南都尉遣丞

相長史御史中丞持節督趣逐捕

師古曰趣讀曰促

汝南太守

嚴訢捕斬令等

師古曰訢與欣同令卽蘇令

遷訢爲大司農賜黃金

百斤

四年春正月行幸甘泉郊泰畤神光降集紫殿大赦天

下賜雲陽吏民爵女子百戶牛酒鰥寡孤獨高年帛三

月行幸河東祠后土賜吏民如雲陽行所過無出田租

夏四月癸未長樂臨華殿未央宮東司馬門皆災

師古曰東

面之司馬門也

六月甲午霸陵園門闕災出杜陵諸未嘗御者

歸家詔曰迺者地震京師火災婁降

師古曰婁古屢字

朕甚懼

之有司其悉心明對厥咎

師古曰悉盡也

朕將親覽焉又曰聖

王明禮制以序尊卑異車服以章有德雖有其財而無

其尊不得踰制故民興行

師古曰行音下更反

上義而下利

師古曰以

義爲上以利爲下

方今世俗奢僭罔極

師古曰罔無也極中也一曰止也

靡有

厭足公卿列侯親屬近臣四方所則

師古曰則法也

未聞修身

遵禮同心憂國者也或迺奢侈逸豫務廣第宅治園池

多畜奴婢被服綺縠

師古曰被音皮義反

設鐘鼓備女樂車服嫁

娶葬埋過制吏民慕效寔以成俗

師古曰寔漸也

而欲望百姓

儉節家給人足豈不難哉詩不云乎赫赫師尹民具爾

瞻

師古曰小雅節南山之詩也赫赫盛貌也師尹尹氏爲太師之官也言居位甚高備爲衆庶所瞻仰其

申敕有司以漸禁之

師古曰謂約束也

青綠民所常服且勿止

師古曰然則禁紅紫之屬

列侯近臣各自省改

師古曰省視也視而改之論語稱曾子曰

吾日三省吾身。○劉攽曰：子謂省者減省也。改者頓改也。司隸校尉察不變者秋七

月辛未晦日有蝕之。

元延元年春正月己亥朔日有蝕之。三月行幸雍祠五時夏四月丁酉無雲有雷聲光耀耀四面下至地昏止。赦天下。秋七月有星孛于東井。詔曰：廼者日蝕星隕，謫見于天，大異重仍。師古曰：仍，頻也。重音直用反。在位默然罕有忠言。

今孛星見于東井，朕甚懼焉。公卿大夫博士議郎其各悉心惟思，變意明以經對，無有所諱。與內郡國舉方正能直言極諫者各一人。師古曰：令公卿與內郡國各舉一人。○宋祁曰：注文南本作內。

郡國共舉人。北邊二十二郡舉勇猛知兵法者各一人封蕭

相國後喜爲鄮侯

○宋祁曰喜字唐本南本並作嘉予據表傳作嘉是

冬十二月

辛亥大司馬大將軍王商薨是歲昭儀趙氏害後宮皇

子

師古曰趙飛燕之妹

二年春正月行幸甘泉郊泰畤三月行幸河東祠后土

夏四月立廣陵孝王子守爲王

○宋祁曰子守爲王景德本史館本唐本並作

子字冬行幸長楊宮從胡客大校獵

如淳曰合軍聚衆有幡校擊鼓也周

禮校人掌王田獵之馬故謂之校獵師古曰如說非也此校謂以木自相貫穿爲闌校耳校人職云六廐成校

是則以遮闌爲義也校獵者大爲闌校以遮禽獸而獵取也軍之幡旗雖有校名本因部校此無豫也○劉敞

曰子謂校讀如犯而不校之校校亦競也競逐獵也宿蕢陽宮

師古曰蕢音倍賜從官

三年春正月丙寅蜀郡岷山崩

師古曰岷音武巾反雍江三日江

水竭二月封侍中衛尉淳于長爲定陵侯三月行幸雍
祠五畤

四年春正月行幸甘泉郊泰畤二月罷司隸校尉官三
月行幸河東祠后土甘露降京師賜長安民牛酒

綏和元年春正月大赦天下二月癸丑詔曰朕承太祖
鴻業奉宗廟二十五年德不能綏理宇內百姓怨望者
衆不蒙天祐至今未有繼嗣天下無所係心觀于往古
近事之戒禍亂之萌皆由斯焉

師古曰始
生曰萌

定陶王欣於

朕爲子慈仁孝順可以承天序繼祭祀其立欣爲皇太
子封中山王舅諫大夫馮參爲宜鄉侯益中山國三萬

戶以慰其意

師古曰以不得繼統爲帝之後恐其怨恨

賜諸侯王列侯金天

下當爲父後者爵三老孝弟力田帛各有差又曰蓋聞

王者必存二王之後所以通三統也

師古曰天地人是爲三統二王之後

并已昔成湯受命列爲三代

師古曰夏殷周是爲三代

而祭祀廢絕

考求其後莫正孔吉

臣瓚曰無若孔吉最正也

其封吉爲殷紹嘉侯

三月進爵爲公及周承休侯皆爲公地各百里行幸雍

祠五畤夏四月以大司馬票騎大將軍爲大司馬

文穎曰王

根也罷將軍官御史大夫爲大司空封爲列侯益大司馬

大司空奉如丞相

如淳曰律丞相大司馬大將軍奉錢月六萬御史大夫奉月四萬也

秋

八月庚戌中山王興薨冬十一月立楚孝王孫景爲定

陶王定陵侯淳于長大逆不道下獄死廷尉孔光使持

節賜貴人許氏藥飲藥死

師古曰卽前所廢皇后許氏也

十二月罷部

刺史更置州牧秩二千石

二年春正月行幸甘泉郊泰畤二月壬子丞相翟方進

薨三月行幸河東祠后土丙戌帝崩于未央宮

臣瓚曰帝年二

十卽位卽位二十六年壽四十五師古曰卽位明年乃改元耳壽四十六

皇太后詔有司復

長安南北郊四月己卯葬延陵

臣瓚曰自崩至葬凡五十四日延陵在扶風去

長安六十二里

贊曰臣之姑充後宮爲婕妤

晉灼曰班彪之姑也

父子昆弟侍帷

幄數爲臣言成帝善修容儀升車正立不內顧不疾言

不親指

師古曰不內顧者謂儼然端嚴不迴眄也不疾言者爲輕肆也不親指者爲惑下也此三句者

本論語云車中不內顧不疾言不親指內顧者說者以爲

前視不過衡軛旁視不過輪較與此不同轉音於綺反臨朝淵嘿尊嚴若神可謂

穆穆天子之容者矣

師古曰禮記云天子穆穆諸侯皇皇大夫濟濟士貽貽故此贊引之

博覽古今容受直辭公卿稱職奏議可述

師古曰稱職克當其任也

可述言有文采

遭世承平上下和睦然湛于酒色

師古曰湛讀曰耽趙

氏亂內外家擅朝言之可爲於邑

師古曰於邑短氣貌讀如本字於又音烏

邑又音烏合反他皆類此

建始以來王氏始執國命哀平短祚莽遂

篡位蓋其威福所由來者漸矣

前漢書卷十

前漢書卷十考證

成帝紀罷六廐技巧官。臣召南按百官表六廐技巧

二官有令有丞屬水衡都尉師古但解技巧未釋六廐於百官表注引漢舊儀卽以太僕之大廐解之恐未爲當此所罷者止言水衡所屬之六廐非太僕所屬也下文又云減乘輿廐馬則太僕所屬者矣

蓋聞天生衆民。○宋本無蓋聞二字別本俱有

五阮關注應劭曰五阮在代郡。臣召南按地理志代

郡無五阮關有五原關疑五阮卽五原音之轉耳

前漢書卷十考證

前漢書卷十一

漢 蘭 臺 令 史班 固撰

唐止議大夫行秘書少監琅邪縣開國子顏師古注

哀帝紀第十一

孝哀皇帝

荀悅曰諱欣之字曰喜應劭曰恭仁短折曰哀

元帝庶孫定陶恭王

子也母曰丁姬年三歲嗣立爲王長好文辭法律

師古曰年

長而好之

元延四年入朝盡從傅相中尉

師古曰三官皆從王入朝

時成

帝少弟中山孝王亦來朝獨從傅上怪之以問定陶王對曰令諸侯王朝得從其國二千石傅相中尉皆國二千石故盡從之上令誦詩通習能說

師古曰說其義

他日問中

山王獨從傅在何法令不能對令誦尚書又廢

師古曰中忘之

及賜食於前後飽起下鞵係解

師古曰食而獨在後飽及起又鞵係解也鞵音

武伐反

成帝由此以爲不能而賢定陶王數稱其材時王

祖母傅太后隨王來朝私賂遺上所幸趙昭儀及帝舅

票騎將軍曲陽侯王根昭儀及根見上亡子亦欲豫自

結爲長久計皆更稱定陶王

師古曰更音工衡反

勸帝以爲嗣成

帝亦自美其材爲加元服而遣之

師古曰爲之冠

時年十七矣

明年使執金吾任宏守大鴻臚持節徵定陶王立爲皇

太子謝曰臣幸得繼父守藩爲諸侯王材質不足以假

充太子之宮

師古曰謙不敢言爲太子故云假充若言非正。宋祁曰非正新本作非如正陸

下聖德寬仁敬承祖宗奉順神祇宜蒙福祐子孫千億

之報

師古曰大雅假樂之詩曰千祿百福子孫千億言成王宜衆宜人天所保佑求得福祿故子孫衆多

也十萬曰億故此謝書引以爲言

臣願且得留國邸旦夕奉問起居俟

有聖嗣歸國守藩書奏天子報聞後月餘立楚孝王孫

景爲定陶王奉恭王祀所以獎厲太子專爲後之誼

師古

日獎勵使也

語在外戚傳綏和二年三月成帝崩四月丙午

太子卽皇帝位謁高廟尊皇太后曰太皇太后皇后曰

皇太后大赦天下賜宗室王子有屬者馬各一駟

師古曰有

屬謂親未盡尚有服者

吏民爵百戶牛酒三老孝弟力田鰥寡孤

獨帛太皇太后詔尊定陶恭王爲恭皇五月丙戌立皇

后傅氏

師古曰傅晏女

詔曰春秋母以子貴尊定陶太后曰恭

皇太后丁姬曰恭皇后各置左右詹事食邑如長信宮

中宮

應劭曰成帝母王太后居長信宮李奇曰傅姬如長信丁姬如中宮也師古曰中宮皇后之宮

追

尊傅父爲崇祖侯丁父爲褒德侯

師古曰傅父傅太后之父丁父丁太后之

父封舅丁明爲陽安侯舅子滿爲平周侯追諡滿父忠

爲平周懷侯皇后父晏爲孔鄉侯皇太后弟侍中光祿

大夫趙欽爲新成侯六月詔曰鄭聲淫而亂樂

師古曰鄭國有

溱洧之水男女亟於其間聚會故俗亂而樂淫

聖王所放

師古曰放棄也論語稱孔子曰放鄭聲

其罷樂府曲陽侯根前以大司馬建社稷策益封二千

戶

師古曰王根也建議立哀帝爲太子

太僕安陽侯舜輔導有舊恩益封

五百戶

師古曰王舜

及丞相孔光大司空汜鄉侯何武益封

各千戶

師古曰汜音汎

詔曰河間王良喪太后三年爲宗室儀

表

師古曰儀表者言爲禮儀之表率

益封萬戶又曰制節謹度以防奢

淫爲政所先百王不易之道也

師古曰言爲常法不可改易

諸侯王

列侯公主吏二千石及豪富民多畜奴婢田宅亡限與

民爭利百姓失職重困不足

師古曰失職失其常分也重音直用反

其議

限列

師古曰令條列而爲限禁

有司條奏諸王列侯得名田國中列

侯在長安及公主名田縣道關內侯吏民名田皆無得

過三十頃

如淳曰名田國中者自其所食國中也既收其租稅又自得私有私田三十頃名田縣道者

令甲諸侯在國名田他縣罰金二兩今列侯有不之國者雖遙食其國租稅復自得田於他縣道公主亦如之

不得過三十頃諸侯王奴婢二百人列侯公主百人關內侯吏

民三十人年六十以上十歲以下不在數中賈人皆不

得名田爲吏

如淳曰市井子孫不得爲吏見食貨志

犯者以律論諸名田

畜奴婢過品皆沒入縣官齊三服官諸官織綺繡難成

害女紅之物皆止無作輸

如淳曰紅亦工也其所作已成未成皆止無復作皆輸所

近官府也師古曰如說非也謂未成者不作已成者不輸耳

除任子令及誹謗詆欺

法

應劭曰任子令者漢儀注吏二千石以上視事滿三年得任同產若子一人爲郎不以德選故除之師古

曰任者保也詆誣也音丁禮反

掖庭宮人年三十以下出嫁之官奴婢

五十以上免爲庶人禁郡國無得獻名獸益吏三百而

以下奉

師古曰奉音扶用反

察吏殘賊酷虐者以時退有司無得

舉赦前往事前博士弟子父母死子寧三年

師古曰寧謂處家持

喪服。朱祁曰前博士一本無前字

秋曲陽侯王根成都侯王況皆有罪

根就國況免爲庶人歸故郡詔曰朕承宗廟之重戰戰

兢兢懼失天心間者日月亡光五星失行郡國比比動

地

師古曰比比猶言頻頻也

廼者河南潁川郡水出流殺人民敗壞

廬舍朕之不德民反蒙辜朕甚懼焉已遣光祿大夫循

行舉籍

師古曰舉其名籍也行音下更反

賜死者棺錢人三千

師古曰賜錢三

千以充棺

其令水所傷縣邑及他郡國災害什四以上民貲

不滿十萬皆無出今年租賦

師古曰什四謂什分損四

建平元年春正月赦天下侍中騎都尉新成侯趙欽成

陽侯趙訢皆有罪免爲庶人徙遼西

師古曰訢欽皆趙昭儀之兄

太

皇太后詔外家王氏田非冢塋皆以賦貧民

師古曰塋冢域也賦

給與也塋音營

二月詔曰蓋聞聖王之治以得賢爲首其與大

司馬列侯將軍中二千石州牧守相舉孝弟惇厚能直

言通政事延于側陋可親民者各一人

師古曰言有孝弟惇厚直言通

政事之人雖在側陋可延致而任者皆令舉之。劉攽曰此詔亦是下丞相大司空者

三月賜諸

侯王公主列侯丞相將軍中二千石中都官郎吏金錢

帛各有差冬中山孝王太后媛

師古曰馮奉世之女也媛音爰

弟宜鄉

侯馮參有罪皆自殺二年春三月罷大司空復御史大

夫

師古曰復音扶目反此下亦同

夏四月詔曰漢家之制推親親以顯

尊尊

師古曰天子之至親當極尊號

定陶恭皇之號不宜復稱定陶尊

恭皇太后曰帝太太后稱永信宮恭皇后曰帝太后稱

中安宮立恭皇廟于京師赦天下徒罷州牧復刺史六

月庚申帝太后丁氏崩上曰朕聞夫婦一體詩云穀則

異室死則同穴

師古曰詩王風大車之篇也穀生也穴冢壙也

昔季武子成寢

杜氏之殯在西階下請合葬而許之

師古曰季武子魯大夫季孫宿也成

寢新爲寢室也

附葬之禮自周興焉

師古曰禮記稱孔子曰合葬非古也

自周公以來未之有改也

郁郁乎文哉吾從周

師古曰論語稱孔子曰周監於二代郁郁

乎文哉吾從周言周觀視夏殷之禮而損益之典文大備吾從周禮也郁郁文章貌

孝子事亡如

事存帝太后宜起陵恭皇之園遂葬定陶發陳留濟陰

近郡國五萬人穿復土

師古曰爲冢壙也復音扶目反

待詔夏賀良等

言赤精子之識

應劭曰諸以材技徵召未有正官故曰待詔夏姓也賀良名也高祖感赤龍而

生自謂赤帝之精良等因是作此識文

漢家歷運中衰當再受命宜改元

易號詔曰漢興二百載歷數開元皇天降非材之佑

應劭

曰哀帝自言不才天降之佑

漢國再獲受命之符朕之不德曷敢不

通夫基事之元命必與天下自新

師古曰基始也元大也始爲大事之命謂

改制度也又曰更受天之天命

其大赦天下以建平二年爲太初元年

號曰陳聖劉太平皇帝

李斐曰陳道也言得神道聖者劉也如淳曰陳舜後王莽陳之

後謬語以明莽當篡立而不知韋昭曰敷陳聖劉之德也師古曰如韋二說是也○宋祁曰子按王莽傳以識

文解釋當作太初元將元年後人不曉四字爲號

輒削去元將二字非是後得唐本元將字果存

漏刻

以百二十爲度

師古曰舊漏晝夜共百刻今增其二十此本齊人甘忠可所造今賀良等重言

遂施行之事見李尋傳

七月以渭城西北原上永陵亭部爲初陵

勿徙郡國民使得自安八月詔曰待詔夏賀良等建言

改元易號增益漏刻可以永安國家朕過聽賀良等言

師古曰過誤也

冀爲海內獲福卒亡嘉應皆違經背古不合時

宜六月甲子制書非赦令也皆蠲除之

如淳曰悔前赦令不蒙其福故

收令還之臣瓚曰改元易號大赦天下以求延祚而不象福哀帝悔之故更下制書諸非赦罪事皆除之謂改

制易號令皆復故也師古曰如釋非也瓚說是矣非赦令也猶言自非赦令耳也語終辭也而讓者不曉輒改

也爲他字失本文也

賀良等反道惑衆下有司皆伏辜丞相博御

史大夫立孔鄉侯晏有罪

師古曰博朱博立趙立晏傳晏

博自殺立減

死二等論晏削戶四分之一語在博傳

三年春正月立廣德夷王弟廣漢爲廣平王癸卯帝太

太后所居桂宮正殿火三月巳酉丞相當薨

師古曰有平當

有

星孛于河鼓夏六月立魯頃王子郟鄉侯閔爲王

蘇林曰郟

音魚縣名也屬東海師古曰又音吾

冬十一月壬子復甘泉泰畤汾陰后

土祠罷南北郊東平王雲雲后謁安成恭侯夫人放

文穎

曰恭侯王崇王太后弟

皆有罪雲自殺謁放棄市

四年春大旱關東民傳行西王母籌

師古曰西王母元后壽考之象行籌

又言執國家籌策行於天下

經歷郡國西入關至京師民又會聚祠

西王母或夜持火上屋

李奇曰皆陰爲陽之象

擊鼓號呼相驚恐

師古曰呼
音火故反

二月封帝太太后從弟侍中傅商爲汝昌侯

太后同母弟子侍中鄭業爲陽信侯三月侍中駙馬都尉董賢光祿大夫息夫躬南陽太守孫寵皆以告東平王封列侯語在賢傳夏五月賜中二千石至六百石及天下男子爵六月尊帝太太后爲皇太后秋八月恭皇園北門災冬詔將軍中二千石舉民兵法有大慮者

師古曰慮謂謀策思慮
○宋祁曰民疑當作明

元壽元年春正月辛丑朔日有蝕之詔曰朕獲保宗廟不明不敏宿夜憂勞未皇寧息

師古曰
皇暇也

惟陰陽不調元

元不贍

師古曰
贍足也

未睹厥咎婁敕公卿庶幾有望

師古曰
望其厲

精爲治婁
古屢字

至今有司執法未得其中

師古曰中
音竹仲反

或上暴

虐假執獲名溫良寬柔陷於亡滅是故殘賊彌長和睦

日衰百姓愁怨靡所錯躬

師古曰錯置
也音干故反

迺正月朔日有

蝕之厥咎不遠在余一人公卿大夫其各悉心勉帥百

寮

師古曰悉盡
也寮官也

敦任仁人黜遠殘賊

師古曰敦厚也
遠音干萬反

期

於安民陳朕之過失無有所諱其與將軍列侯中二千

石舉賢良方正能直言者各一人大赦天下丁巳皇太

太后傅氏崩三月丞相嘉有罪下獄死

師古曰
王嘉

秋九月

大司馬票騎將軍丁明免孝元廟殿門銅龜蛇鋪首鳴

如淳曰門鋪首作龜蛇之形而鳴呼也師古
曰門之鋪首所以銜環者也鋪音普胡反

二年春正月匈奴單于烏孫大昆彌來朝二月歸國單

于不說

師古曰說讀曰悅

語在匈奴傳夏四月壬辰晦日有蝕

之五月正三公官分職大司馬衛將軍董賢爲大司馬

丞相孔光爲大司徒御史大夫彭宣爲大司空封長平

侯正司直司隸造司寇職

師古曰司直司隸漢舊有之但改正其職掌而司寇舊無

今特制置故云造也。宋祁曰南本職字上有官字

事未定六月戊午帝崩于未

央宮

臣瓚曰帝年二十卽位卽位六年壽二十五年師古曰卽位明年乃改元壽二十六

秋九月

壬寅葬義陵

臣瓚曰自崩至葬凡百五日義陵在扶風去長安四十六里

贊曰孝哀自爲藩王及充太子之宮文辭博敏幼有令

聞

師古曰博廣也敏疾也令善也聞名也

睹孝成世祿去王室權柄外移

是故臨朝婁誅大臣欲彊主威以則武宣

師古曰則法也

雅性

不好聲色時覽卞射武戲

應劭曰卞射皮卞而射也蘇林曰手搏爲卞角力爲武戲

也晉灼曰甘延壽傳試卞爲期門師古曰蘇晉二說是

卽位痿痺

蘇林曰痿音萎枯之萎如淳曰

痿音躄躄之痿弩病兩足不能相過曰痿師古曰痿亦痺病也音人佳反痺音必寐反躄躄者弩名事見晉令

躄音煩

末年霈劇

師古曰霈漸也

饗國不永哀哉

師古曰永長也

前漢書卷十一

前漢書卷十一考證

哀帝紀使執金吾任宏守大鴻臚持節徵定陶王○胡三省曰大鴻臚掌諸侯故任宏守大鴻臚以迎定陶王守者權守也

待詔夏賀良等言赤精子之讖○臣召南按讖字始見

於此高祖以斬白蛇旗幟上赤然張蒼謂漢本水德公孫臣非之至武帝時猶謂以土德王未有言火德者也赤精子之說亦起于此張平子謂讖起哀平之間信哉

號曰陳聖劉太平皇帝注如韋二說是也○胡三省曰

韋說不詭于正如說則近于巫顏以二說爲是將安從乎

又注宋祁日子按王莽傳以讖文解釋當作太初元將元年云云。臣召南按宋說是也太初是武帝年

號此時何至重紀蓋惑于術士之說創立四字年號以示更新其後雖不施行然後世四字年號遂起于此

二年。○監本作元壽二年。臣照按帝紀從無此例凡年

號于元年特書二年以後卽蒙前文未有再書者元壽二字明係衍文今刪去

前漢書卷十一考證

前漢書卷十二

漢 蘭 臺 令 史班 固撰

唐正議大夫行秘書少監琅邪縣開國子顏師古注

平帝紀第十二

孝平皇帝

荀悅曰諱衍之字曰樂應劭曰布綱治紀曰平師古曰衍音口旱反

元帝庶孫

中山孝王子也母曰衛姬年三歲嗣立爲王元壽二年

六月哀帝崩太皇太后詔曰大司馬賢年少不合衆心

師古曰董賢

其上印綬罷賢即日自殺

○朱祁曰唐本無即日二字

新都

侯王莽爲大司馬領尙書事秋七月遣車騎將軍王舜

大鴻臚左咸使持節迎中山王

師古曰爲使而持節也使音所吏反

辛卯

貶皇太后趙氏爲孝成皇后退居北宮哀帝皇后傅氏

退居桂宮

師古曰北宮及桂宮皆在城中而非未央宮中也

孔鄉侯傅晏少府

董恭等皆免官爵徙合浦

師古曰恭董賢之父

九月辛酉中山王

卽皇帝位

劉歆曰辛酉去哀帝崩六十四日

謁高廟大赦天下帝年九

歲太皇太后臨朝大司馬莽秉政百官總已以聽於莽

師古曰聚束曰總音惣

詔曰夫赦令者將與天下更始誠欲令百

姓改行絜已全其性命也往者有司多舉奏赦前事累

增罪過誅陷亡辜殆非重信慎刑洒心自新之意也

師古

曰洒滌也音先禮反

及選舉者其歷職更事有名之士則以爲難

保

師古曰更經也難保者言已嘗有罪過不可保也更音工衡反

廢而弗舉甚謬於赦

小過舉賢材之義

師古曰論語云仲弓問政孔子曰赦小過舉賢材故此詔引之

諸有

臧及內惡未發而薦舉者皆勿案驗

師古曰有臧謂以臧貨致罪

令

士厲精鄉進

師古曰鄉讀曰嚮

不以小疵妨大材

師古曰疵病也

自今

以來有司無得陳赦前事置奏上

師古曰置立也置奏上謂立文奏而上陳

也上音時掌反

有不如詔書爲虧恩以不道論定著令布告天

下使明知之

元始元年春正月越裳氏重譯獻白雉一黑雉二

師古曰越

裳南方遠國也譯謂傳言也道路絕遠風俗殊隔故累譯而後通

詔使三公以薦宗廟

羣臣奏言大司馬莽功德比周公賜號安漢公及太師

孔光等皆益封語在莽傳賜天下民爵一級吏在位二

百石以上一切滿秩如真

如淳曰諸官吏初除皆試守一歲廼爲真食全奉平帝卽

位故賜真師古曰此說非也時諸官有試守者特加非常之恩令如真耳非凡除吏皆當試守也一切者權時

之事非經常也猶如以刀切物苟取整齊不顧長短縱橫故言一切他皆放此○劉敞曰予謂吏俸雖有其名

皆不滿其數平帝卽位推恩故賜令滿秩如二千石者得兩百也顏百官表注吏俸差是其注云漢制三公

稱萬石其俸月各三百五十斛穀其稱中二千石者月百八十斛二千石者百二十斛比二千石者百斛云云

據後漢注所定千石以下歲得多少本數此自建武時所加者非西漢舊事也立故東平王雲

太子開明爲王故桃鄉頃侯子成都爲中山王封宣帝

耳孫信等三十六人皆爲列侯太僕王暉等二十五人

師古曰暉音於吻反前議定陶傅太后尊號守經法不阿指從邪

右將軍孫建爪牙大臣大鴻臚咸前正議不阿師古曰左咸

後奉節使迎中山王

師古曰謂奉持節而爲使

及宗正劉不惡執金

吾任岑中郎將孔未尙書令姚恂沛郡太守石詡

師古曰岑

音士林反恂音荀詡音況羽反

皆以前與建策東迎卽位

師古曰帝本在中山出關

而迎故曰東迎與讀曰豫

奉事周密勤勞賜爵關內侯食邑各有差

賜帝徵卽位前所過縣邑吏二千石以下至佐史爵各

有差又令諸侯王公列侯關內侯亡子而有孫若子同

產子者皆得以爲嗣

師古曰子同產子者謂養昆弟之子爲子者

公列侯嗣

子有罪耐以上先請宗室屬未盡而以罪絕者復其屬

師古曰復音扶目反

其爲吏舉廉佐史補四百石

如淳曰宗室爲吏及舉廉及佐

史皆補四百石師古曰此說非也言宗室爲吏者皆令舉廉各從本秩而依廉吏遷之爲佐史者例補四百石

天下吏比二千石以上年老致仕者參分故祿以一與

之終其身

師古曰參三也

遣諫大夫行三輔

師古曰行音下更反

舉籍吏

民

張晏曰舉錄賦歛之籍而償之

以元壽二年倉卒時橫賦歛者償其

直

師古曰卒讀曰猝橫音胡孟反

義陵民冢不妨殿中者勿發

如淳曰陵上有

宮墻象生制度爲殿屋故曰殿中師古曰此說非也殿中謂壝中象正殿處

天下吏民亡得

置什器儲侍

師古曰軍法五人爲伍二伍爲什則共其器物故通謂生生之具爲什器亦猶今之

從軍及作役者十人爲火共畜調度也儲積也侍具也侍音丈紀反○宋祁曰唐本無吏字

二月置

義和官秩二千石外史閭師秩六百石

應劭曰周禮閭師掌四郊之民

時其徵賦也

班教化禁淫祀放鄭聲乙未義陵寢神衣在柙

中丙申旦衣在外床上

文穎曰哀帝陵也衣在寢中今自出在床上師古曰柙匱也音

狎

寢令以急變聞

師古曰非常之事故云急變

用太牢祠夏五月丁

巳朔日有蝕之大赦天下公卿將軍中二千石舉敦厚

能直言者各一人六月使少傅左將軍豐

師古曰甄豐○宋祁曰傅

一作

賜帝母中山孝王姬璽書拜爲中山孝王后賜帝

舅衛寶寶弟玄爵關內侯賜帝女弟四人號皆曰君食

邑各二千戶封周公後公孫相如爲褒魯侯孔子後孔

均爲褒成侯奉其祀追諡孔子曰褒成宣尼公罷明光

宮及三輔馳道天下女徒已論歸家顧山錢月三百

如淳

曰已論者罪已定也令甲女子犯罪作如徒六月顧山遣歸說以爲當於山伐木聽使入錢顧功直故謂之顧

山應劭曰舊刑鬼薪取薪於山以給宗廟今使女徒出錢顧薪故曰顧山也師古曰如說近之謂女徒論罪已

定並放歸家不親役之但令一月出錢三百以顧人復也爲此恩者所以行太皇太后之德施惠政於婦人復

貞婦鄉一人

師古曰復音方目反鄉一人取其尤最者

置少府海丞果丞各

一人

師古曰海丞主海稅也果丞掌諸果實也

大司農部丞十三人人部一

州勸農桑太皇太后省所食湯沐邑十縣屬大司農常

別計其租入以贍貧民秋九月赦天下徒以中山苦陘

縣爲中山孝王后湯沐邑

師古曰陘音形

二年春黃支國獻犀牛

應劭曰黃支在日南之南去京師三萬里師古曰犀狀如水牛

頭似猪而四足類象黑色一角當額前鼻上又有小角。宋祁曰南本顏注一角字上有有甲二字詔曰

皇帝二名通于器物

孟康曰平帝本名箕子更名曰衍箕用器也故云通于器物今

更名合於古制

師古曰更改也

使太師光奉太牢告祠高廟夏

四月立代孝王玄孫之子如意爲廣宗王江都易王孫

盱台侯宮爲廣川王

師古曰盱音許于反台音怡

廣川惠王曾孫倫

爲廣德王封故大司馬博陸侯霍光從父昆弟曾孫陽

宣平侯張敖玄孫慶忌絳侯周勃玄孫共舞陽侯樊噲

玄孫之子章皆爲列侯復爵

師古曰共讀曰恭復音扶福反

賜故曲周

侯酈商等後玄孫酈明友等百一十三人爵關內侯食

邑各有差郡國大旱蝗青州尤甚民流亡安漢公四輔

三公卿大夫吏民爲百姓困乏獻其田宅者二百三十

人

張晏曰王莽爲太傅孔光爲太師王舜爲太保甄豐爲少傅是爲四輔莽復兼大司馬馬宮爲司徒王崇

爲司空是爲三公

以口賦貧民

師古曰計口而給其田宅

遣使者捕蝗民捕

蝗詣吏以石斛受錢

師古曰量蝗多少而賞錢

天下民貲不滿二萬

及被災之郡不滿十萬勿租稅民疾疫者舍空邸第爲

置醫藥

師古曰舍止也

賜死者一家六尸以上葬錢五千四尸

以上三千二尸以上二千罷安定呼池苑以爲安民縣

師古曰中山之安定也洹音大河反

起官寺市里募徙貧民縣次給食至

徙所賜田宅什器假與犁牛種食

師古曰種音之勇反

又起五里

於長安城中宅二百區以居貧民

如淳曰民居之里

秋舉勇武

有節明兵法郡一人詣公車九月戊申晦日有蝕之赦

天下徒使謁者大司馬掾四十四人持節行邊兵

師古曰行

音下更反

遣執金吾侯陳茂假以鉦鼓

晉灼曰百官表執金吾屬官有兩丞候司

馬應劭曰將帥乃有鉦鼓今茂官輕兵少又但往諭曉之耳所以假鉦鼓者欲重其威也鉦者鏡也似鈴柄中上下通師古曰鉦音征鏡音女交反募汝南南陽勇敢吏士三百人諭說

江湖賊成重等二百餘人皆自出送家在所收事

如淳曰賊

雖自出得還其家而已不得復除尚當役作之也師古曰如說非也言身既自出又各送其家人詣本屬縣邑

從賦役耳○劉攽曰賊二百皆異縣人既自出故送家在所收事也重徙雲陽服虔曰重成重也作

賊長帥故徙之也賜公田宅冬中二千石舉治獄平歲一人李奇

日吏治獄平端也

三年春詔有司爲皇帝納采安漢公莽女

師古曰婚禮有納采問名

之禮謂采擇其可娶者語在莽傳又詔光祿大夫劉歆等雜定婚

禮四輔公卿大夫博士郎吏家屬皆以禮娶親迎立輅

併馬

服虔曰輶音誦立乘小車也併馬驪駕也師古曰新定此制也併音步鼎反

夏安漢公

奏車服制度吏民養生送終嫁娶奴婢田宅器械之品

立官稷及學官

如淳曰郊祀志曰已有官社未有官稷遂立官稷於官社之後臣瓚曰漢初除

秦社稷立漢社稷其後又立官社配以夏禹而不立官稷至此始立官稷光武之後但有官社不立官稷師古曰淳瓚二說皆未盡也初立官稷於官社之後是爲一處今更創置建於別所不相從也郡國曰學

縣道邑侯國曰校校學置經師一人鄉曰庠聚曰序

張晏

曰聚邑落名也師古曰聚小於鄉聚音才喻反

序庠置孝經師一人陽陵任橫

等自稱將軍盜庫兵攻官寺出囚徒大司徒掾督逐皆伏辜安漢公世子宇與帝外家衛氏有謀宇下獄死誅

衛氏

四年春正月郊祀高祖以配天宗祀孝文以配上帝改

殷紹嘉公曰宋公周承休公曰鄭公詔曰蓋夫婦正則

父子親人倫定矣前詔有司復貞婦歸女徒師古曰復音方目反

誠欲以防邪辟師古曰辟讀曰僻全貞信及眊悼之人師古曰八十曰

眊七年曰悼眊者老稱言其昏暗也悼者未成爲人於其死亡可哀悼也眊音莫報反刑罰所不

加聖王之所制也惟苛暴吏多拘繫犯法者親屬婦女

老弱構怨傷化百姓苦之師古曰構結也其明赦百寮婦女非

身犯法及男子年八十以上七歲以下家非坐不道詔

所名捕它皆無得繫張晏曰名捕謂下詔時所捕也其當驗者卽驗問

師古曰就其所居而問定著令二月丁未立皇后王氏大赦天下

遣太僕王暉等八人置副假節分行天下覽觀風俗

師古

日行音下更反

賜九卿已下至六百石宗室有屬籍者爵自五

大夫以上各有差

師古曰五大夫第九爵

賜天下民爵一級鰥寡

孤獨高年帛夏皇后見于高廟加安漢公號曰宰衡

應劭

曰周公爲太宰伊尹爲阿衡采伊周之尊以加莽

賜公太夫人號曰功顯君封

公子安臨皆爲列侯安漢公奏立明堂辟廳

應劭曰明堂所以正

四時出教化明堂上圓下方八窗四達布政之宮在國之陽上入憲法入風四達法四時九室法九州十二重

法十二月三十六戶法三十六風七十二牖法七十二

兩孝經曰宗祀文王於明堂以配上帝上帝謂五時帝

太昊之屬黃帝曰合宮有虞曰總章殷曰陽館周曰明堂辟靡者象璧圓雍之以水象教化流行○宋祁曰注文三十六雨雨字舊作旬七十尊孝宣廟爲中宗孝元

二風風字舊作候疑此本有誤

廟爲高宗天子世世獻祭冬置西海郡

○宋祁曰新徙本去冬字

徙

天下犯禁者處之梁王立有罪自殺分京師置前輝光

後丞烈二郡更公卿大夫八十一元士官名位次

師古曰更

也改及十二州名分界郡國所屬罷置改易天下多事吏

不能紀冬大風吹長安城東門屋瓦且盡

五年春正月祫祭明堂

應劭曰禮五年而再殷祭壹禘壹祫祫祭者毀廟與未毀廟之

主皆合食於太祖

諸侯王二十八人列侯百二十人宗

室子九百餘人徵助祭

師古曰徵召也

禮畢皆益戶賜爵及金

帛增秩補吏各有差詔曰蓋聞帝王以德撫民其次親

親以相及也昔堯睦九族舜惇敘之

師古曰虞書堯共云昔在帝堯克明

峻德以親九族九族既睦平章百姓咎繇暮曰惇敘九族庶民明厲翼言堯能明峻德之士而任用之以睦高祖玄孫之親迺令百姓平和章明舜又厚敘此親使衆庶皆明其教而自勉勵翼戴上命也故此詔引之

以皇帝幼年且統國政

師古曰朕者太皇太后自稱也

惟宗室子皆太

祖高皇帝子孫及兄弟吳項楚元之後

師古曰吳項謂高帝之兄仲也

初爲代王後廢爲合陽侯而子濞封爲吳王故追諡仲爲吳項王項讀曰傾

漢元至今十有

餘萬人雖有王侯之屬莫能相糾

師古曰糾謂禁察也

或陷入刑

罪教訓不至之咎也傳不云乎君子篤於親則民興於

仁

師古曰此論語載孔子之辭也言上能厚於親屬則下皆化之起爲仁行也以論語傳聖人之言故謂之

傳他皆類此

其爲宗室自太上皇以來族親各以世氏郡國

置宗師以糾之致教訓焉二千石選有德義者以爲宗

師考察不從教令有寃失職者宗師得因郵亭書言宗

伯請以聞

晉灼曰宗伯宗正也師古曰郵行書舍也言爲書以付郵亭令送至宗伯也郵音尤

常

以歲正月賜宗師帛各十匹羲和劉歆等四人使治明

堂辟靡

師古曰爲使者而典其事

令漢與文王靈臺周公作洛同符

師古曰文王築靈臺周公成雒邑言與之符合

太僕王憚等八人使行風俗

師古

曰行音下更反

宣明德化萬國齊同皆封爲列侯徵天下通知

逸經古記天文歷算鍾律小學史篇方術本草及以五

經論語孝經爾雅教授者在所爲駕一封軺傳

如淳曰律諸當

秉傳及發駕置傳者皆持尺五寸木傳信封以御史大夫印章其乘傳參封之參三也有期會累封兩端端各

兩封凡四封也乘置馳傳五封也兩端各二中央一也軺傳兩馬再封之一馬一封也師古曰以一馬駕軺車

而乘傳傳音張戀反遣詣京師至者數千人閏月立梁孝王玄孫

之耳孫音爲王冬十二月丙午帝崩于未央宮

臣瓚曰帝年九

歲卽位卽位五年壽十四師古曰漢注云帝春秋益壯

以母衛太后故怨不悅莽自知益踈篡弒之謀由是生

翟義移書云上椒酒置藥酒中故大赦天下有司議曰禮

臣瓚曰

臣不殤君皇帝年十有四歲宜以禮歛加元服

臣瓚曰在長安北六十里

詔曰皇帝仁惠無不顧哀

多所顧念哀憐

每疾一發氣輒上逆害於言語故不

及有遺詔其出媵妾皆歸家得嫁如孝文時故事

師古曰媵

妾謂從皇后俱來者媵之言送也媵音食證反又音孕

贊曰孝平之世政自莽出褒善顯功以自尊盛觀其文

辭方外百蠻亡思不服

師古曰大雅文王有聲之詩曰自東自西自南自北亡思不服

言武王於鎬京行辟雍之禮自四方來觀者皆感其德化心無不歸服故此贊引之

休徵嘉應頌

聲並作

師古曰休美也徵證也

至乎變異見於上民怨於下莽亦

不能文也

如淳曰不可復文飾也

前漢書卷十二

前漢書卷十二考證

平帝紀故桃鄉頃侯子成都爲中山王○胡三省曰平

帝入奉大宗故立成都以奉孝王後

臣召南

按成帝

立定陶王爲太子卽立楚孝王孫景奉定陶恭王祀
卽此事所本也

封宣帝耳孫信等三十六人皆爲列侯○通鑑考異曰
紀在元年莽傳在五年按王子侯表皆以元年二月
丙辰封莽傳誤也胡三省曰按表陶鄉侯恢等十五
人皆以二月丙辰封不及三十六人之數又無信名
蓋恢等皆宣帝曾孫也

罷安定呼池苑以爲安民縣。○臣召南按志中山國無

安民縣何也

置西海郡。○臣召南按莽所置西海郡在金城郡臨羌

縣塞外西北地理志可証西海曰僊海亦曰鮮水海

卽今青海也

分京師置前輝光後丞烈二郡。○胡三省曰前輝光蓋
領長安以南諸縣後丞烈蓋領長安以北諸縣也

前漢書卷十二考證